



明文奇賞卷之九

史官陳仁錫明卿甫評選書

文

誚伯牙文

方孝孺

譽人者譽
于人者皆

可思

世傳伯牙事陋矣張文潛爲賦哀之其辭信美而其義
尤陋也余讀而鄙之爲文誚伯牙且正張子之陋其辭
曰戰國之士好夸嗜毗恒詭實以求合不顧人之是非
於斯時也求自重而違世者嗟吾舍子而稱誰然於子
有憾焉蓋惜子爲藝也善而爲識也卑君子之學自得
而已苟余中之有樂遑恤世之愠喜感子期之見知遂



絕絃於旣死悲乎陋哉子之志也知子一人不知舉世
使夫人能識子則何名爲絕藝俚歌巷語嬰孩啟齒惟
其不知乃至貴子之不幸子期是值忘子之惡舉子
之愛俾爾望於人也過深而得於天者不至子誠有以
自適天地日月草木庶類舉目欣然皆識子意苟爲不
得雖子期接踵譽言盈耳亦何預於吾子且夫全於天
者不求合於人志乎遠者不取效于邇嗟伯牙乎爾曷
不以萬物爲一身以太虛爲知己等毀譽於浮說而游
心乎冲漠之鄉下迨乎無窮上泝乎無始以與無耳者
聽無言者語奚爲栖栖焉隘狷而可鄙此藝之所以爲

小技而予固不足與聞乎此也耶

里社祈晴文

只是罵吏民之窮亦甚矣。樹藝畜牧之所得。將以厚其家。而吏實奪之。既奪於吏。不敢怨怒。而庶幾償前之失者。望今歲之有秋也。而神復罰之。嘉穀垂熟。被平原隰。淫雨暴風。旬月繼作。盡撲而將之。今雖已無可奈。然遺粒委穗。不當風水衝者。猶有百十之可冀。神曷不亟訴於帝。而遏之。吏貪肆而昏冥。視民之窮而不恤。民以其不足。罪固莫之罪也。神聰明而仁閔。何乃效吏之爲。而不思拯且活之。民雖蠢愚。不能媚順於神。然春秋報謝。以答神貺。

者苟歲之豐未嘗敢怠使其靡所得食則神亦有不
利焉。天胡爲而不察之民之命懸於神非若吏之暫而居
忽而代者之不相屬也。隱而不言民則有罪知而不恤
其可與否神尚決之敢告。

贊

春秋諸君子贊

有亭

方孝孺

昂然

余取友於當世而未得則於古人乎求之讀春秋左氏傳得數十人心慕焉聖賢所稱較著者不敢論少戾乎聖賢之道者不敢取自石碣以下十有五人取其事贊其美以爲法云

石碣

臨危善斷
是作手

國之所恃在老成人以國爲家不私其親知以發謀勇以戡亂雍容談笑坐拯世難侃侃石子衛之父師先事而諫徵若著龜始不吾從弑逆果作徐發一言元亮就

縛春秋所書篡弑孔多誰能討賊不煩干戈雄才勁節
英識大器仇牧晏嬰視之有媿世悅苟難滅親是稱臨
危善斷卓乎難能嗟衛之微臣有石子嗚呼九州敢謂
無士。

季梁

賢知所居國小猶強文謨武猷屹如金湯荆楚之隨可
坐而取久而不忘以有君子具在朝廷敵國震驚有旅
若林莫之與京及乎棄賢奸雄相賀世無人望雖強易
破長孺在漢子儀在唐叱咤指麾威行萬方彼冥弗思
忽不知貴我懷生民今也誰恃

臧僖伯

臧僖伯諱之。弭亂世貴乎兵。兵之所加。治其旣形。心術之微。禍亂所自。孰能治之。諫臣之事。在昔魯隱。矢魚於棠。其事雖微。其志已荒。有臣僖伯。憂其慚懈。昌言正色。以訓以戒。天稔其禍。聞善不爲。鍾巫之難。實兆於斯。聖之求諫。匪曰觀美。羣情旣宣。萬事畢理。自以爲智。厭棄人言。篡弑將行。至死不聞。諫之不用。鮮不亡國。我思若人。中古遺直。

公子友

魯有季子社稷大臣處人所難不失其仁莊僖之間尤

弟多故叔牙慶父交紊王度親爲骨肉義存君臣縱則
廢法斷傷乎恩酌事之中酬酢萬變龍驤虎踞蛇豕屏
鼠才優於爲齊以無私春秋嘉之志其來歸周公東征
克對文武烈烈季子不忝皇祖後世之士量小才輕大
故臨前驚怖失聲聖賢至公狗道忘已後國先家季子
所耻

叔盼

淺而醒

士處衰世若行泥塗孰能超然不受其汚叔盼之賢高
潔蓋世非義之祿笑而不視兄也有國匪君斯君獨深
恥之安乎賤貧我捆我履可以衣食我身雖勞吾義已

春秋一
道

得彼爲富貴千乘萬鍾其外雖導疑作通其心則窮人之
所趨不我能止我之所志不以易彼卑卑小夫利達是
圖朝讐夕臣犬豕不如伯夷之清子臧之節周公之孫
曾邦之傑

劉康公

道在天下莫不與聞能知其真千載一人春秋之間何
國無士名言至論卓卓可紀有偉劉子獨得其宗矢辭
豈多妙合大中孰養其原以定厥命必有事焉勤禮致
敬後乎洙泗先乎唐虞聖賢有傳不謀而符生民夢夢
飲食作息道之不明誰達其極三代君相治之師之逮

劉康公以
議論范文
子以實事
聖有王道
學

德下衰以法縻之上曠其職下悖其紀孰非天民嗚呼
劉子

范文子

霸國之士尚利與功納君于邪不思其忠孰若夫子識
微慮遠以勝為懼勇于從善鄢陵之戰楚師大崩矢中
其王蠻方沸騰眾誇威強獨有憂色外患盡寧非計之
得彼昏不戒以幸為常上肆下陵禍興蕭牆先事有言
眾謂迂怪深謀弗從卒履其敗六國滅秦晉亂平吳全
盛之邦多忽永圖烈烈夫子非霸者佐以道事君大臣
之亞

春秋尚利
則稱子臧
孟獻尚忌
則稱祁奚
子皮尚兵
則稱范文
子魏絳尚
借窮則稱
季札

子臧

恒人於利錙銖必競亦獨何心力讓千乘仁義可樂名
節可尊冑取瓦礫棄遺璵璠篡弑紛紛孰非臣子先生
醜之恐其污已高不忘世潔不亂倫大鎮社稷爲曹宗
臣秦楚有王雄霸中國戰不足稱千載汙辱去彼取此
疇能與偕以利易生果何人哉

臧文仲

衆人之生莫不有死死而可傳舉世無幾有美大夫國
之典刑仁義之言煥如日星其身有終其名不沒後人
宗之指爲口實晉楚之盛豈乏世卿貴富一時事無餘

名。大夫立言後世是式念哉勿忘尚懋厥德

祁奚

賢才之生國用所資觀其進退治亂從之。一人在朝善類興起欲知其心尚視所舉彼也吾戚此也吾朋人以爲比吾舉其能孰爲隙讐孰所怨惡吾取其才餘不暇顧心無黨私爲國得人苟利於國遑恤我身古之君子自信不苟不以毀譽輒變所守嗟世之人匪矯則偏或遠之用或親之捐有徇大公舉讐與子取謫速咎終莫能以道不勝僞治功日汙豈特夫子當世所無

魏絳

晉有跛夫好兵而懷以一笑故幾亡人國天鑒凶德卒
傾厥宗三郤受誅假手厲公允文魏子以兵爲戒輯和
戎夏晉以昌大悼公之世屢合諸侯績業文襄政教具
修意之所嚮靡有不服羣賢在位魏子之力士不知道
以戰爲嬉孰能無爲坐制四夷

孟獻子

世無材智不過於削非有仁人何以爲國魯號多士粲
乎有文穆穆獻子其德可尊用侈國貧言利愈密宣成
之間苛政橫出夫子是悼勢莫止之昌言在人後世紀
之乘馬之微雞豚不畜富盡天下恒患不足古稱盜臣

或以爲才我懷夫子莫知我哀

李札

士之制行不必於同取舍進退惟義之從苟同其跡不
度乎義尚類古人非德之至嗟嗟季子賢且有文博達
通微世鮮其倫使之有位變夷以夏桓文之績不足與
伍天將喪吳嚚童僭攘晦德潔身效節子臧道之廢興
蓋曰有命行非子光止豈子病衆人何知爲譽爲尤孰
明子心其惟春秋世教日衰戰爭求位季子有知當爲
流涕

子文

大人無私物我同視善出於人與己無異人之勝己善者已能翼而扶之與之俱升授之國柄躬率以聽賞罰弛張必從其令此謂盛德自古難之懿哉子皮爲公卿師僑實國禎社稷是賴振經立則國勢幾大非子知人羣枉孰容鄭之有政夫子之功紛紛鄙夫識闇量淺已則無能惡人爲善世之不治豈曰無賢孰起子皮吾爲執鞭

子家羈

曾有盜臣擅國自恣昭公寡謀躁以失位遜齊居晉淹恤八年惟子家子奉以周旋自有可爲謀猷甚遠拒而

正不以成
敗論人

不從卒以喪返使用其言動合事機豈其終身棄國不歸久而彌恭困而無怨義不近名忠不避難考德千載難乎其全夫子之節允也可傳晉文五臣世嘉其績彼也。以。才。夫。子。以。德。

蜀守贊

文公翁

漢初之治猶有秦風刀筆程才賤德右功矯矯先生知政之首閔俗之龐化民以道肇建學宮俎豆詩書英俊如雲從于後車蜀人聚觀爭服章甫儒教顯行齊于鄒魯兩漢之間號蜀多才孰啟其端先生所培惜其不遇

俗吏亦好
士然名耳

惠止一州使秉國鈞四海蒙休俗吏卑卑僅圖旦夕孰
能起之俾輔邦國

張公詠

爲政匪難患才之卑才優於事乃克有爲惟忠定公萬
夫之傑屢剖郡符有聲烈烈威惠所被梁益其尤坐鎮
西南分天子憂時其寬嚴陽舒陰慘談笑指麾奸強破
膽豈惟善政可配古人卓行危言爲世名臣將相無功
名隨身逝誰能使民廟祀百世乘風騎氣公神在天嗟
彼儉邪敢執公鞭

三賢贊

有序

聖賢之道。以養氣爲本。今之人不如古者。氣不充也。氣不充則言不章。言不章則道不明。予竊有意於道而患委靡不振。思起古豪傑而與之遊。求於往昔得三人焉。曰司馬子長。曰韓退之。曰歐陽永叔。三人皆氣豪辭雄。有振衰立懦之功。因各爲贊辭。時觀之以自勵。將由此進於聖人之道。非敢以是爲足也。作三賢贊。

司馬子長

三代之隆。斯文顯然。惟太史公震盪奮騫。江河之深。泰華之高大。包宇宙。小析絲毫。唐虞盛德。湯武峻功。春秋之辭。楚漢之雄。韋編竹書。金匱石室。千載遺亡。公手紀。

論其大節

馬肅

述掃刮晦蒙揭茲日月上翼典謨下昭大法彼敗降者
名將之孫公白其辜覆謂多言凡人受辱孰不就死所
不、死、者、建、大、名、爾、名、立、不、磨、赫、赫、哉、哉、比、績、丘、明、功、孰
少、多、卓、哉、英、賢、允、矣、良、史、何、人、無、知、巷、伯、是、擬、公、去、千
年斯文湮沒紛紛鄙夫敢繼公筆

韓退之

漢後七代道喪言勢不有先生孰興斯文先生之生志
豪、氣、雄、手、扶、百、川、注、之、使、東、刮、垢、去、腐、煥、其、一、新、詆、排
佛老扶起孟荀誰輿朽骨天子是迎請投水火以滅禍
萌喁喁鱷魚爲潮之毒帝念南氓俾往殲戮大海茫洋

五嶺蒼蒼發爲文章震盪激昂山不足高海不足深斯
文在茲無古無今惟鄒孟子仁義干戈先生在唐與之
爲徒吁此何時愈下彌衰先生不生孰扶孰持是氣長
存磅礴上下有繼徽猷不在來者

歐陽永叔

宋至仁宗文治告成寔生偉人以鳴太平偉人爲誰曰
歐陽公宗孟繼韓蔚爲文宗五季之末支離黷昧公曰
嘻哉非予疇繼刪煩剷華去其艱深大濩咸池厥音沉
沉如玉之溫如波之澄不撓不驚旣暢且明伊周以來
以文致窮千載惟公躋身顯融旣掌帝制亦預國政正

色危言以犯以諍。維蜀有蘇出公門下。謂公斯文可比。
韓愈公之謂蘇。托以斯文。後世誦公哲於知人。何哉。鉅
儒以多爲貴。人也可欺。天也可畏。

尚友五贊 有序

有憂世之志。而無經世之才。有經世之才。而無成物之
德。欲以有爲於天下。皆古昔之所難也。聖賢之跡不見
于世也久矣。慕事功者多蔽于卑近。務高遠者每病于
難行。吾求士于二千載之間。功業赫然可稱。而秉心操
行不倍于聖賢之道者得五人焉。皆天下之才士。今世
之所未聞。而余之所願學者也。故贊其盛。以識余之私。

不安于三
賢又不安
十五友真
志士

因是五君子以望乎聖人之大全此余之志也以五君子爲足法而不以大者自望非余之志亦非五君子之志也

諸葛武侯

漢治任法難乎大臣惟忠武公千載一人綜覈萬變以義而動虎躍龍驤天下震恐極其智能亂不足平天實厄之大勲無成成敗紛然處之甚暇論其所存伊呂流亞古學不傳士氣益卑公心不亡百世之師

陸宣公

士不知義以國爲外媚悅取容自爲身計嗟吾先生慨

諫書多流
涕又有讀
諫書而流
涕者耶

然哀之君非堯舜媿見色辭諫書如雲指訐遺闕忠邪
義利不少撓折事雖多違言則長存用諸天下可安黎
元豈若俗儒以文嬉戲先生見之當爲流涕

范文正公

古之至人忘已徇民一夫顛連如疾在身此義不明貴
我賤物以民自奉恬不加恤孰若先生惟民之憂飲食
夢寐四海九州先事而言庸狡所忌就其所成允足經
世世之通患溺於故常聖法皇猷訾以爲狂誰能致遠
而舍車馬敢謂先生不在天下

韓忠獻公

正無可喜

只是至誠
感動盡力
維持

生民難。謚天下大器。必能容之。而後可治。大人之量。喬嶽巨川。未嘗有爲萬物資焉。豈若淺夫。露其才智。初如可喜。卒敗大事。堂堂魏公。宋之宗臣。元氣流行。爲初爲春。欲名其功。公本無作。視其用舍。爲民憂樂。世彌遠矣。孰尚嗣之。我觀九州悠悠。我懷

司馬文正公

儒者之澤。大行于民。伊周以來。惟公一人。始末可爲萬鍾。不受逢時多艱。爲世父母。凡民之心。惟久乃安。欲其卽從。聖人猶難。亦獨何脩。政化甚速。誠于爲善。四海悅服用。術相欺。惟恐不深。公神在天。汝果何心。

舉帝后以
風頑徒

云敝贊 有序

捐其軀有益於天下君子之所樂爲也而況身不至於
死而有益於世教者乎宜乎趨義者之衆也然而人寧
舍其生以徇利而不屑勉其身以爲義死于利者首交
於世而爲義死者歷數百年無一人豈其所重在彼而
所輕在此哉知利之可以養生而不知其可以傷生知
義之或至於殺身而不知殺身之可以不朽也古之仁
人義士視刀鋸如飲食恬然就之而不辭者其好惡寧
獨異於人哉見義明而慮道遠如是而死則安如是而
生則辱如是而富貴則足耻如是而貧賤則可樂故其

取舍之際斷乎其不苟也。師弟子之義與君臣父子等。古人蓋甚重之。漢之時猶未變。夏侯勝爲孝昭皇后授經。勝卒后素服五日以報師傅之恩。夫以帝后而爲師傳服羣臣不以爲過。則當時之俗猶可見也。風化成于上。雖以強臣亂賊之威。指叱鼎鑊以待天下之士。而士生乎其時。猶有赴難蹈義正色疾趨而不顧者。此漢所以爲盛也。與王莽之殺吳章。欲禁錮其子弟。門人多更名它師。而平陵云敞幼時爲大司徒掾。獨自劾吳章弟子收抱章尸歸棺斂之。當時以是高之。比爲纁布而敞竟以是名。後世敝學術不可考。後嘗仕莽爲魯郡大尹。

其行已未能無可議者然其事師不以死生變節誠志
義之士也哉章弟子千餘人賢於敝者必衆矣畏禍懼
位竟泯滅無聞而敝之名與朱雲相上下慕義之士其
可不勉乎夫不以貴賤生死爲厚薄者非知道君子不
能斯心也任社稷托幼孤將無所不可非若淺夫小人
之不足仗也余是以贊之以爲弟子事師遭變故者之
法贊曰
人之趨勢皆若可託觀于生死乃見厚薄朝以爲師暮
則昔之人實易誑心其可欺嗚呼云生志剛氣烈曷以
知之偉然大節妻子在後鈇鑕在前所見者義吾何恤

焉。吾身可恤。師其可負。視更名者。犬齒之伍。道喪名散。
俗益壞。偷面恭背。違犬鼠所羞。不趨其難。矧狗其死。我
獨何人。嗚呼云子。

楊喬贊 有序

富貴不可輕也。然人不能輕富貴。則不能處富貴。捕虎
者。未嘗畏其爲虎。故帖耳妥尾。而惟吾之擒。知其爲虎。
而畏之。則必爲所噬矣。人惟內有所重。故視外物也輕。
天下之物。舉不足動其心。然後可以用。天下之物。一爲
物所動。將爲物役之。不暇而何暇用物哉。東漢固多節
士。及其衰也。貪懦者處大位。而君子皆困于下。故小人

得志以至于亡。不然當時之士皆王佐才也得一人且可鞭笞海內之盜賊。況若是其衆乎。楊喬不在郭林宗徐孺子之列。然吾觀其人不出孺子下。蓋其志可尚也。人有慕富人之財而挑其女以逃者。爲利所役。視富人若王侯將相。視其家若鈞天帝宮。而不知其爲可恥也。由君子觀之。苟不以義則宗堂邃寢猶蟻穴然。珪組之貴與苴蒯無以異。曾何足願乎。萬乘之主天下之至貴也。妻帝之女人臣之至榮也。喬惟恐爲所汙餓死而不辭。此其心豈可以勢利奪哉。使喬不死命爲大臣屬以天下漢猶可興也。桓帝不爲天下慮而爲一女計。可謂

若具此服
則卑卑勢
利皆飢不
可食寒不
可衣者

史筆

不知人矣。喬之賢豈可以女子誘哉。然桓帝雖不知喬，而知愛其才，則後世之不如桓帝者多矣。獨喬難遇耶。吾常喜孺子爲人飢不可得而食，寒不可得而衣，以爲孺子與林宗猶夷與惠雖不可以優劣而孺子尤可慕。蓋漢季一人而已。及觀喬事壯其志，喟然歎曰：孺子不孤矣。吾求友於古人，舍孺子與喬而誰取耶。世皆知重孺子而不知喬，可恨也。作楊喬贊，使人知重喬者自余始。贊曰：

人之器量有小有大。或盜一錢，或讓天下。天下雖大，一錢之積，觀其用心大者，可識。吾謂楊喬可爲三公，屈以

非義萬鍾不從曷由知之有大人節帝女不娶利豈能
奪其中所重在義與道視卓操輩穿窬之盜伊誰可方
孺子之倫永言尚友卓哉二人

田疇贊

有序

智勇人之所有也善用之爲難忠義人之所慕也審處
之爲難天下非無豪傑之士而功不見著於世何耶豈
其智勇之不及忠義之沮喪與用之失其時處之違其
機者衆也荀彧不用於曹操則可以比子房董卓呂布
不爲逆亂則可追韓彭廉丹王尋爲漢而死則可以與
周苛等而皆不免於君子之誅其迹同而其所爲異也

要做忠義之士其出處必有可觀

漢末之亂酷矣余求奇士於其時得一人焉曰田疇忠不避難勇不畏死奮然感劉虞之遇而思爲之報讐公孫瓚旣亡謂可以盡力者漢室而已故應曹操之辟旣而知操非忠漢者也故辭封侯之爵介不同俗清不悖倫忠在樹功義不苟合其才良其行果蓋豪傑之士非當時奸雄所及也論者眩於成敗使操以成功見取而疇之志義不大章明於後世豈不謬哉孟子曰人有不爲也而後可以有爲若疇者庸非其人耶其不成功者命也豪傑之士制於命而不獲施者衆矣善觀人者觀其志不觀其事觀其器不觀其位由是而言士之不幸

者獨疇乎哉吾是以悲而贊之其詞曰
古之觀人不於用舍考其所存以第高下譬諸龍駒垂
首糞車豈以其賤斥之爲駑齊侯千駟如南面王仲尼
之嘆夷齊有光漢季分爭得國者操吾獨何爲田疇是
悼操雖據國犬鼠之雄殺后無君天下不容奚若田疇
忠義蓋世委質劉虞身死靡二使受之命爲漢大臣殺
操復漢必不顧身嗚呼鄙夫惟利是就誰能爲疇我與
爲友

李太白贊

唐治旣極氣鬱弗舒乃生人豪洩天之奇矯矯李公雄

國初諸鉅
筆皆以氣

勢故恭尚
乃爾

蓋一世麟游龍驤不可控制粃糠萬物甕盎乾坤狂呼
怒叱日月爲奔或入金門或登玉堂東遊滄海西歷夜
郎心觸化機噴珠湧璣翰墨所在百靈護持此氣之充
無上無下安能瞋目開于黃土手搏長鯨鞭之如羊至
于扶桑飛騰帝鄉惟昔戰國其豪莊周公生雖後斯文
可侔彼何小儒氣餒如鬼仰瞻英風猶虎與鼠斯文之
雄實以氣充後有作者尚視于公

孔璋贊

有序

所貴乎天下者非謂兵甲之多玉帛之富擅海內之地
擁百萬之師無術以守之而至於敗亡者衆矣天下安

恃乎此蓋人之羣居必有其望百人聚兵鬪之不止一人叱之卽愧作謝罪而引退者此必人之所望也欲服天下之心者必先求天下之望而尊之所慕愛敬屬欲俎豆之而不可得者立於朝廷則民焉有不歸者乎故周之興也以伯夷高光之興也以得張子房卓茂而賓師之武帝有汲黯諸侯惴畏而不敢叛代宗相楊綰唐幾中興斯數君子者其容貌非動人才力非能與舉旗斬將者角然而聞其風烈奔走順從惟恐不得觀其輝光者德弘于中聲名著于當世有非才藝之士所及也故一才一藝治功可稱者可以有可以無而名德

爲四海望者國家興替之所繫也唐天寶之亂世皆咎其不用張九齡信矣然吾觀是時有名之士如李邕秦和亦一世望也而玄宗不能容之所信任者皆小人之尤聞之可爲凜凜而玄宗不悟是豈特足以失國而已哉殃不逮其身則幸也當泰和之被繫張說輩皆擠搆之欲致之死而布衣孔璋獨上書請以身代璋信奇士乎而唐之君臣爲可愧矣國不惜才而使布衣惜之斯世果何如也吾感璋之義讀其疏而爲之泣下曰玄宗之治不足觀矣賴有孔璋耳作孔璋贊其詞曰世有英傑生民之望國能尊之天下可王如海如河魚

誰知以害
為此辣手

龍所依。既據其依。孰不畢來。唐李泰和亦天下士。胡不
存之。欲實之死。天將亡唐。故褫其魄。人望既隕。唐幾不
國。我謂玄宗不若孔璋。義聲洸洸。暴于四方。布衣愛士。
而國惡之。我思孔璋。孰知我悲。

表安臥雪圖贊

士必有守。乃果於爲。苟賤卑汙。大節已墜。烈烈司徒處
困。不折志行。皎然與雪俱潔。登庸三朝。作社稷臣。萬乘
安危。寄公一身。羣竇朋奸。海內震恐。正色揚言。臨不敢
動。孰能使然。惟氣直剛。養諸衡門。施于廟廊。臥雪有圖。
千載作則。貪夫視之。尚喪其魄。

御書贊

有序

塞公有題
此替矣

中書舍人臣蹇義以忠謹蒙

寵遇

皇上爲更今名而御書以賜之會臣以校文來不京

師義以見示謹稽首作贊曰

惟天不言以象示人錫羨垂光景星慶雲聖人憲天與

天同德誕宣至文以立民極包犧之畫神禹之疇昭揭

天心臨照九州後王稽古莫不有作孰能巍然前聖是

若明明我皇聖與神通煥發天章衣被萬邦嶠夷昧

谷髫童鮐叟大訓宏謨傳誦人口惟是御書世則罕觀

如彼瑞物時見人間虹光寶氣上燭霄漢見者稽首心

駭目眩臣義何修乃克有之天錫嘉名孰與之夷常人
萬言理有未足惟聖一辭終身可服君臣之體父子之
倫遠之天下邇之修身由義而行罔有弗至對越幽明
浩然無愧古人作聖敬立義行推其緒餘可臻治平衆
兆寡知舍此弗踐心學無傳事功靡建義尚念哉祇奉
聖猷天子命汝俾自慎修如山如河如鼎如壁以利
萬物以鎮社稷前有千古後有萬年爲一不義以負于
天天之所賜惟德可守鬼神相之終古是保

朱方中像序贊

吾鄉士君子尚禮義而重名節凡仕于天下者雖學術

有淺深才器有巨細政術有疎密至其所守未嘗不有以過乎人蓋習俗然也開封朱通判方中士之廉慎敦厚者也居官且二年獨携一子與居弊廬蕭然壁無完土而牖無完紙厨廩薪芻幾不屬處之裕如不以動其心而惟以奉法守官爲先務夜四鼓輒呼童奴起盥櫛坐聽事或至晚始得一食不知飢渴之及也予過大梁見而嘉重其所守因書贊以識其行事以示閭里云行本於儒不驕不汙人或以爲迂言本乎書不諂不誣人或以爲愚政事舒徐規矩靡踰人或以爲疎夫孰知其外如不足而內實有餘不適于時而與古爲徒嗟乎使

憤世

斯人而爲世之所喜吾必謂風俗已復乎古初

赤壁圖贊

羣兒戲兵汙此赤壁江山無情猶有慚色帝命偉人肩
山之蘇酹酒大江以滌其汙揮斥玄化與造物伍哀彼
妄庸攘攷腐鼠明月在水獨鶴在天勿謂公亡公在世
間

八字堪圖
赤壁

畫梅贊

有序

金華潛溪公以翰林學士承旨致仕居家時嘗以郡人
徐原父所畫梅寄余兄希學筆法清勁有出塵之意公
薨今數年矣藏之不忍視族祖雪窩處士雅好畫論及

畫梅取公所寄而閱之如見公焉處士欲得之因以獻
處士且贊之曰
玉質冰姿不汙纖塵破顏一笑萬物皆春我思若人潛
溪之上見者凜然如對公像

馬圖贊

有序

遇一不俗
之馬凡馬
雖易甚矣
人惟俗不
可醫

昔人之論馬多以升天閑被服御爲貴故畫者喜極其
形容以余言之物貴乎全其天而莫累乎不得自適使
馬受羈勒備法駕有韓哀伯樂之徒以爲御猶不若羣
遊自肆之爲樂况御非其才任非其道乎同郡高君示
余以唐人所畫三馬頽然天放得馬之性非深于物理

者不能也。因爲作贊云。

麒麟騶虞貴不可羈。強加銜轡於馬爲疵。世人不察。以
此爲美飾之金玉。非馬所喜。嗟此三駿。乃馬之龍棄。違
天閑。追雲躡風。羣飲于江。江水欲竭。仰天大鳴。氣薄日
月。伯樂視之。振鬣奔馳。况介俯首。駕君鼓車。龍性難馴。
暫與馬伍。霹靂上天。雨水九土。

序

送凌君入太學序

方孝孺

所習所能
賈止於此
可奈何

不愛官爵
已占地步
一二分

爲士之患常在乎自處太淺而望乎上過深聖賢之道至大矣其全可以治天下變風俗而其緒餘猶足以守一官化一鄉非止小材曲藝而已也故古之君子學之終身而不敢以爲成材周於用而不敢以爲能今之士不然所習者未脫乎剽竊誦說之間而充焉以爲足所能者不過乎室家隣里之近而肆然以爲高聖賢觀之何其淺乎上之爵祿所以待賢者固古君子之所辭讓而不肯居者也今之士則以爲分之宜得處卑則覬乎

崇仕外則希乎內、怨訐而悲戚、勢取而力求、其望乎上、非過深乎、上之所以勞於育才而病於少功也、然亦有故焉、鄙生於所求、貪生於所驕、求之盡其道、則鄙者可化矣、用之當其才、則貪者可消矣、今之成均、育才之地也、欲得才之美者而用之、舍二者奚先乎、士惟有慕道、德之志、然後可以當大任、有輕貴富之心、然後可以成大功、是豈庸人所能及哉、浦江凌允恭、嶢然有志操、以郡諸生選入成均、別予、欲求予言、允恭之才已爲州里所推、予無以贊也、然予恐其所以至者爲足而過望於上也、故有以贈之、

涉張比林
覺難爲林
亦吳越所
至偶然並
身

贈王仲縉序

饑而食、飽而嬉、營私而驚利、生無聞而死無述者、衆人
也、食焉而思、思焉而行、不憂其身之窮、而憂道之不修、
不懼其家之無財、而懼乎名之弗揚者、君子也、衆人之
所爲、切於身、而見效近、故人之趨事者夥、君子之所務
事、旣緩而功亦遲、故衆人多笑之、而不知衆人之所爲、
又君子之所悲也、吾昔年舟還自金陵、泊姑蘇城下、舟
人指城中大第謂余曰、此元僞吳張氏官也、余問今其
家安在、則已無噍類矣、問其人名、字、則已莫有知者矣、
及至錢塘道西湖、舟人數謂余言林處士事、曰、此處士

故宅也。此處士墳墓也。此處士曾遊之地也。余未嘗不爲之太息。方張氏盛時。據數州之富。擅王侯之貴。驅百萬之人。以給其所欲。其車服宮室。妾媵珍寶。騶從師徒。僭擬乘輿。而自謂一時之雄矣。而今未下十年。乃若此處士在宋時。破廬弊褐。羸童野鶴。出入於烟霞水石間。其窮困莫比。今越二三百載。姓名猶灼然在人耳目。則區區之富貴者。何足道。而士之貧賤。又何足憾哉。

范氏族譜序

爲子孫以奉先祀亦難矣。爲常人之子孫非難而爲名人之子孫難也。爲名人之子孫固難而爲大賢之子孫

國初諸老
永重譜序
訓已訓人
命通學

卷之九
國脉久長
不墜于此

尤難夫嚴蒸嘗守冢墓保上世之所傳以自立於閭里
常人能是亦足矣而欲繼名人之門者豈止於斯而已
乎行焉必端也言焉必信也學必有以過於人而才必
有以用於世也求無愧於名人庶乎其可也而欲卓然
立於大賢君子之後以求無忝焉則此何足以慰天下
之望哉故言乎家世之可貴則莫尚乎爲賢者之子孫
言乎道德之難全亦莫難乎爲聖賢之後也美才篤行
之士子孫能世其家者未嘗絕而孔孟之胄千載無顯
人非無顯人也祖德崇高難乎其爲顯也蜀之范氏在
宋盛時忠文公景仁以危言高節爲海內所宗而正獻

公淳夫以直道正學爲元祐名臣正獻之子元長復能繼先業爲建炎良史官聲猷之美後先相照可謂盛矣元長七世孫煥卿值元季之亂圖牒散亡重緝所知自忠文公高祖而下至于今凡十五世爲家譜以示將來煥卿之子彥良從予遊因以序爲屬古之貴乎修譜者非特以著世次紀官位而誇于人也蓋將使後世觀之而考世德之淳疵明流澤之廣狹而益思所以自立云爾在忠文之時秉國柄以好惡榮辱當世士者莫如王安石呂惠卿在正獻時莫如章惇蔡京張商英林希之流此數人者方其志得氣盛視賢士大夫不啻其敵讐。

必欲擯廢竄殛之而後快。由今觀之。彼之禍心虐誅銷滅無遺。而凶聲惡聞。不可掩匿。人至不忍言之於口。而其遺胤亦未聞有存者。縱或有之。非惟人所惡見。而爲之子孫亦羞稱其世。而不慊其爲人。范氏二三公。雖不獲富貴於時。或遭竄斥以死。然至今尊仰師慕。愈久而益隆。而其後人猶能嗣詩書禮樂之傳。久而弗變。則夫人亦何樂爲小人而不思爲君子之歸哉。范氏子孫觀乎譜而師先祖之善戒。小人之惡。則爲君子也可異矣。夫有君子而無祿位。族雖衰猶盛也。祿位光榮而君子無聞焉。族雖盛猶衰也。煥卿年八十餘。學行敦慎。鄉人

辨甚則簡
益信簡之
難

稱之而彥良亦好學有志所謂無忝於賢者之子孫其
將在是乎

送平元亮趙士賢歸省序

考郭士淵集
當作平元亮

文所以明道也文不足以明道猶不文也三代以上斯
道明故其文簡三代以降道晦而不章人各以意求之
故其文繁吳之人論舟可一言而喻胡羌之人終日談
而不得其狀知與否之異也聖人之言如書易春秋之
所載孔氏弟子之所述片辭可以善其身而治天下豈
好爲畧哉無所用繁也莊周荀卿之著書其辭浩浩乎
若無窮於道邈乎未有聞非工於言而拙於道也求道

而不得從而以言窮之、雖欲簡而不可致耳、然其文猶未弊也、自夫不徇道而徇人、不求合於古而求合於今者、始相如、開其源、崔蔡暢其支、魏氏迄乎唐初、助其瀾者、盈天下、天下之言文者、諛乎人而已矣、宜乎時而已矣、何有於道哉、唐之中世、昌黎氏嘗一反之、而道不足以逮文、宋之盛時、程氏嘗欲拯之、而文不能以勝道、歐氏蘇氏學韓氏者也、故其文昌、朱氏張氏師程氏者也、故其道醇、合二者而有之、庶幾不愧於古乎、而天下未見其人也、嗚呼、今之學者、欲復古之文、難矣、古之道、不過譽於人、不浮費於辭、今則不然、譽不過、則人以爲慢、

辭不洽則人以爲吝。位尊則形於言。勢卑則怒於色。懷之出戶則裂而棄之矣。古之道論是與非也。必當賢之與否也。必嚴。其辨不自棄其身。不苟從乎時。今之人不然。深謀則以爲刺譏。正言則以爲擊排。志乎道則訾以爲迂。慕乎聖賢則謗以爲誕。師以是爲諱而不講。弟子以是爲嫌而不爲。嗟乎。今之君子。何由而復古之文乎。古之文也質。今之文惟恐其不華也。古之文也正。今之文惟恐其不阿也。古之人所學者道。今之人以道爲不必知也。當今之世。非豪傑之才。惡能捄之乎。匪遺乎今。不足以追古。匪弗願乎人。不足以明道。匪有得乎道。吾

未見其能文也、同郡牟君元亮、趙君士賢、太學之能文者也、國家將望之以復古之文、吾喜古道之見於今也、於其歸省、故與之論文、

其體貌與文備文
昔也國家崇望文以貴古之文垂青古並文其意今
未其其辨文也師釋字係文故張黑士釋大字之辨文

書

與蘇先生 其三

方孝孺

去年得叔度書、已知執事念太史潛溪公之德、欲爲論次遺事以傳、私心喜慰、繼以感泣、旋聞從者校文關中、不知歸期何時、而某卧病山中、無由遇括蒼路使、欲致一書達所欲言、至今未果、自古聖賢君子、道德言行信於天下者、如孔子孟子、身沒而言在者、若無待於人之傳、然由門人弗圖其傳也、後世史官無所憑信、往往勦取異聞怪說、以實其事、或不知其姓字、壽年之真、讀其書者、至今以爲恨、其次若楊雄王通、俱號一世大儒、咸

有所論著以發其蘊蓄、亦若不待人言而後信矣。然雄以作美新媚莽、受訾于世、或者謂非雄所著、殆後人依倣而爲之、通書稱隋唐大臣皆其弟子、識者謂多誤妄、疑非出于通之手、若是者、使其門人有所述以紀是非之實、寧有紛紛異論哉。惟其當時以爲吾師之德行文章自足以傳、而有輕視天下之意、故天下之人得持此遺失而議之。嗚呼、天地之大、日月之明、無所資于人、而其行度、徐疾盈虛之數、猶必俟人紀之、而後定。彼以聖賢君子爲無待於人之言、不亦大過矣乎。吾太史公遠宗孔孟、以爲學高視雄、通而有餘、其著書、其制行、其事

君行道固已暴於四方而信於當時傳於蠻夷之國而
誦於縉紳當世雖未有發明之者亦無害其不朽也決
矣第其末年遭罹飛語一子一孫死於禍而家遷身放
卒于異鄉倘不得有道而能言者白其本心告之萬世
曖昧之謫人將憾之非特忠賢受抑於無窮且俾聖朝
有知人未明之損豈細故哉宜乎執事有意於圖之也
千載之間士之蒙誣受誑者何限遠則司馬子長以言
語被刑蔡邕以慨歎受戮近則程叔子有貪黷之謫涑
水公遭姦黨之名其他擠於險詖之人汚於朋黨之論
生不得訴寃于朝歿不得返塋於里者不可勝計然其

後死者曰
熟讀

人推高

心跡卒光明于後世者賴有明士端人斷以天下之公
是非而不惑于流俗一時之私意大者辯其誣於史策
小者表所銘墓以示將來是以士有就死而不恨挫抑
而愈光以有人發揚於後也今執事居與公同鄉學與
公同道於公有師友之義而公之自朝退休于家也屬
望於執事者甚厚且執事嘗官太史而以論譏之作爲
已任於公之事而不有述焉何以解後人之疑正流俗
之失而慰公之神靈於地下哉雖然公之心不期人之
白已也忠義自信而且嘗爲人言事君猶事父與事天
也父不可欺天不可怨順受之而已矣每論古人遇貶

竄而怨誹、及爲文過於憤激者、深已薄之、以爲不達君
臣之義、其素所存者如此、及乎臨大故、遭大禍、視子孫
之死、夷然不少見顏面、竄逐之至、若返其鄉、次于江壖、
端坐而逝、此其心豈以世之榮辱介意哉、其信乎已者、
可以質之幽明而無怍、考諸聖賢而不愧、其於人之謗
且譽、若推之以爲高也、抑之以爲卑也、安之而已矣、身
受其患、尚無怨尤、而於事行之白、不白也、復何較焉、然
而某之有求於執事、而欲圖公之傳者、非爲公計也、爲
誦公之文、尊公之德、而欲盡知其平生之計也、是則斯
文烏可已哉、自公之亡、天下無師、後生小子、自以爲高、

而議公者多矣、然徐而視之、如蚊蚋之羣、忽已消、而公固自若、竊亦見其不量力而徒爲爾嘵嘵也、人之賢不肖固有定論、文章之高下亦然、近時作者漸以稀濶、在東南惟執事及徐教授耳、徐公之文、簡質典重、有渾然之氣、然推贍暢急言極論而不竭者、實惟執事、某往與太史公論斯事、過辱特見許與、而前輩三數公復從而推獎之、然七八年痛自摧斥、向時之可盡矣、人持所業、殊與相見時異、惟以體乎身、見乎事、有補乎聖賢而傳之萬世、此鄙陋之志、而亦太史公夙昔期望之意也、執事可無以教我乎、士氣日卑、學術日趨於污下。

某病廢無聊無足負荷斯事矣惟
吾自謀以大宣
正學上報國家下慰相知者之望心所欲言者無踰于
此而當今可告以此言者惟執事耳故卒一言之

荅林公輔

僕自京師歸潛伏奧密不與世人往來於有聲勢者尤
不喜見兼以疾瘧彌年氣力羸憊未嘗妄出戶限又素
嬾作書疏由是平生故人如足下者例成疏濶瑄上人
及同姓九成回再承寄至書撫問稠疊厚甚且知足下
棄官代父軍役旋即蒙恩復其章綬行益修文益峻聲
譽益隆此固閭里所望者然僕私願於足下則不止此

百餘年來士大夫學術卑陋駁雜不復知聖賢成已正心之大方苟焉以釣名取寵謐陳言記成說則夸以爲知經據拾騫補稍旁句讀則自負以爲能文風俗旣成衆咸趨之而不可制僕誠慙駭無似亦欲掃末流之弊復前聖之軌使古人之大全復章徹于天下質弱器陋志力不强疾病侵加朋友衰散獨行而莫爲之徒空言而無誰與和不能有所建明之漸可見於此矣於是之時而求可以共進于斯道者舍足下將安望哉往年任郡城中相與往復論議甚壯四顧坐席皆一時之英以爲吾輩講習之樂當自此始豈知數年之間葉公死伯

十年前予
嘗銘其坐
云天能困
我以功名
而不能禁
其不讀書
報我以子
嗣而不能
禁其不爲
善有感也
夫

欽之官北方、足下之京師、延壁元采、各奔走於饑寒、而
僕復俛俛與樵夫野人爲伍、年齒益加、志願愈乖、困窮
愈篤、嗟夫、使吾至此而不獲與聞斯道者、孰非天耶、而
吾尚何怨乎、所可恃者、與足下皆未老、制於人而不得
爲者、吾莫如之何、由乎我而人莫之制者、勉而終業、必
有所可望、求諸千載之上、有師友焉、放諸四海之內、有
同志焉、垂之百世之後、有知己焉、一其心而定其志、遠
其期而後其獲、不有得於人、將有得於天、不有取於今、
將有益於後來、然則吾之自處者、豈不裕、而望于足下
者、夫豈薄也哉、寄示諸文、已詳讀之、求之輩流、可謂特

出而有餘矣。然吾猶願足下以古人自鑑而裁其高下、
勿爲諂妄小生所戲、僕輩之不及古人、正以好諂自盈、
故無日進之階耳。使日有人攻擊吾之過闕、寧不早有
所聞而迷悟至此哉。前時好作文字、諂子動輒以班馬、
韓歐相誑、時聞其言、心亦自喜。今而思之、使果如前諸
公、亦未足道。而况不及萬萬哉。近來絕不喜執筆、看古
人文辭、多不當意、不知病昏而然耶。抑有以也。今年當
里長適值海濱築城之役、三夫一抽、衆務騷然、病餘復
患瘡瘍、殊無意思。欲與足下言者、滿膺臨紙都忘却。僅
發一二、聞周君顧君皆安、甚慰。當國家任賢之時、各勉。

求文者亟讀

忠盡以立事功、有暇時寄書以警發固陋、不宜

○與士脩 其二

辱書、重以詩集序見屬、意若罪其逋緩者、此誠足罪也、然僕於庸衆人、苟有所求、皆不敢拒而亟昇之、豈於足下而有所惜邪、顧謂凡物處美惡之間者、必待人言而後定、足下之詩、辟之夜光照、乘委之道上、亦知其爲可寶矣、苟又從數數、然噪于其側、指於人、以爲寶、不亦費於辭乎、斯僕所以久而未作者、以足下自足、取信於世、而然耳、非果有所惜也、今足下乃不以至美自居、而若有取于無能之言、何所取之異邪、雖然、世之有求于僕、

邑里遺事
與周易數
辭皆予不
見其書

者。非能真知斯文之足取也。眩於好譽者之云而不自知耳。天下之好文章者比肩。而知言者無幾人。以斯文稱於人者相望。而能言者無幾人。能言而知人之言者。足下是也。然則足下雖無待於僕。僕固將卒言之。而况懇然屬之乎。僕之狂言。今且出矣。足下誠知言。當有以復我。無徒罪其遲而幸其得也。

與王脩德
其四

承寄示古賦及雜詩數篇。賦寓意深遠。得楚人音節。詩亦蕭然有出塵之韻。諷詠累日。喜不自勝。某向以安居飽食。無毫髮及物之益。妄不自度。欲蒐輯邑里遺事。成

一小書上以昭揚賢士君子之潛德下以爲勸于將來俾後生小子有所慕而爲善蓋舉古間師黨正之臧爾非敢妄竊褒貶之柄而冀其傳也夫古人之傳世者豈偶然哉其事足傳矣其辭不能發之則不可傳其辭與事稱矣作者之道德言行不足取信於世則雖傳而人不之信今縱使有卓然宏偉可喜之績付之無聞之人著以不聞之辭亦恐其卒歸于泯墜而况耆舊淪喪之餘聞其名者不知其事言其事者莫考其實而欲取信於無窮焉可冀乎是以嘗爲吾兄言其故而久未成書者此也忠節好友篤行之人旣各爲之傳其他文學貴

顯者欲析而二之則其跡雖有隱顯之殊而其志行學術初不相遠以仕者爲宦達旣非所以尊之俱目之曰儒林則亦有以政事稱者今不敢僭爲區別通謂之先達列傳但以時世分先後而不以仕否爲重輕竊意如是庶乎不失其序而無抑揚去取之嫌若夫治邑之大夫其有惠政及民如陳長官胡汲仲亦不可使其遺事日就亡失今爲立良吏篇以處之凡名姓稱于吏民之口者皆得附見焉然宋數百年歷賢令丞多矣世絕無所傳聞往時紀土風者俱棄而不錄今亦無所徵而爲之立傳使其人皆若洪忠宣者由是而興處顯位立名

績于天下固不待此而傳若不幸官僅止此疲其心思
智力斬一聞于來世而又不可得豈非可恨哉前所問
數公不知曾得其事狀否第宋末爲文者矯陳腐之過
喜以新奇亂事實如君家太常固未免此近訪得太常
及鄭龍圖墓銘至于官位亦以他名易之讀之殊不曉
其所居爲何職所行爲何事惟視之太息而已文之爲
文豈以此等新奇爲好哉真不識其何說也夫文辭於
學者至爲淺事以道言之正不必求其新奇惟發人所
未嘗言之理則可謂之新非衆人思慮之所及則可謂
之奇如孔子之大傳有聖人以來未之有也子思之中

庸孟子之七篇有諸子以來未之有也周子之太極通
書張程之西銘易傳以至朱子之所論著有經說以來
未之有也以其古所未有謂之新奇或可也然聖賢豈
務爲新奇哉其道明其德盛其言不得不高且美耳故
夫外道德以爲文辭者皆聖賢之所棄者也近時自悼
少時狂謬所好所業者不過記誦文辭而記誦不能博
文辭不能工則又僅得其最陋者以是空言寢多絕無
自得之味思一屏絕之而以顏曾所以自治者治其心
爲日稍久覺向時過闕愈衆苟不早悟其非幾老死匱
盎中與蚊蚋俱盡而不知天地日月之爲大深可懼也

吾兄前書有學無端緒之歎甚見進學之篤近世之淺陋者正坐易足而自高耳未能執筆已斥顏柳不知晉人書法未能遣辭已呼蘇子瞻爲阿軾欲毀棄其文於孔孟之書未嘗詳讀旬日已指程朱說經之誤紛然辯駁不自愧耻此其人豈復知有天地日月也哉吾輩當深以之爲戒求古人崇大之域而趨焉可也所欲言者無窮不爲吾兄發之則無所發矣然不能詳畧道一二林嘉猷在此靜篤可喜不欲其專意爲文辭嘗痛與之言凡在此者亦皆知所向方但未知終竟如何耳近鮑民瞻來其爲人有意於學俾且讀四書以端其本知聖

賢所言之要。自當知其本末也。鄉里質美者。不爲少。但不喜學。故無由與之言。使得數十輩。錯布一邑。豈非美事耶。有雜詩數首。書遺嘉猷。風味出所寄茅栗下。如蹲鴟黃。獨不足適口。然或有無味之味也。久不執筆。不復成字。聊發一笑。

○與鄭叔度

其七

自發義烏。信引領西跂。視日如年。今兩月矣。忽奉手書。垂閱之思。愛厚之意。僕心之所同。而不能言者。燁然溢乎翰墨間。捧誦循環。且歎且羨。病懷得此。若脫垢汙。而濯清泉。不知疾痛之在躬也。所可憾者。太常丈及范先

生皆傾逝斯道寥寥無所係屬近時海內知名之士非窮困卽死不死卽病如僕之愚不足比數於士君子之林久矣然自去冬得痰瘧疾輾轉至今屢愈屢作寒熱之餘伸紙握筆欲有所論著未能終四五行欠伸掉栗已欲就枕席不知天所予奪禍福竟如何今世人雖不見甚壽者然山谷間恒人年八九十或百歲者時有之如前之二公使之少緩一二十年而死誰以爲過而忍奪之孰知其故耶僕今始三十氣力志意便已如老人但髮未白面未皺耳家兄長僕八年數年之前居喪過哀被疾苦僂狀尋常患肩背痛不能出僕雖可出亦未

嘗出門於世務都不通曉閭里小兒挾奸舞詐狼貪鼠
黠變態百爲視僕僕懦可弄輒私相目謂真愚人獨賴
季弟頗解事近者按田造圖及他細事壹以諉之人頗
謂其能而病夫因得安居以養拙拙益甚家益落有田
數十畝小民見其不足爲輕重棄不爲佃萊棘盈疇家
人報絕糧輒笑曰古人有三旬九食瓶無儲粟者窮者
豈我獨耶且天下之得其願者少不得其願者皆是也
吾縱自憂其如衆人何因相與大笑而止處塵埃中不
慣與流俗往還厭其喧鬧每欲縛一椽於萬山絕頂人
跡所不至處從一二友生讀書嘯歌以自樂伐木誅茅

非有力者不能因自歎、非惟古之貴富人不可效、欲效
畸人靜者巖棲谷汲以自快、亦莫之遂。吾之貧困過古
人遠矣。貧富貴賤豈學道者所當掛口哉。恐吾兄別我
久、思我深、欲知其所自處、故盡發之以當談笑耳。蘇公
平仲近因黃巖人寄書來、相問意甚款款、頗自悼聯事
者皆非同輩、難與言、思解去而不得、世所憤憤者多、固
宜有此歎。然古之君子、豈皆擇世而居耶、亦當安之而
已。太史公千載之託、未得其人、煩其作一文甚好、功行
之詳、只用僕所述歷官記、叅以後所見聞足矣。若欲明
白公之本心、僕雖無狀、他日不敢辭也。公無恙、日嘗欲

收僕申以婚姻之好、還家言之、而祖母不許、公亦繼以
事去、遂不相聞、平居常以爲恨、然公所欲親厚之者、欲
世講師友之契耳、此身倘有樹立、誓不敢忘、但媿學術
荒陋、無所建明、孤負期待、以損知人之哲、然僕之無成、
亦朋友之辱也、吾兄可徒譽我、而不我教、憐我而無以
處我乎、金華以道術相傳者百餘年、范公之亡、有繼其
後者否、吾兄亦宜勉之、拳拳愛慕之心、舍此無可祝者、
德輶如毛、人鮮克舉之、愛莫助之、惟厚自貴重、以扶植
斯文、

諸名韓柳
文章亦是
天地間一
物蓋愛其
書則其人
愈可念也

一自爲別、不復以書相問者六年、患難憂苦、何所不罹、
形跡幾於相忘矣、然夢寐中、未嘗不相會于羅山之下、
兩溪之間也、閒居獨處、追惟昔日賢豪之盛、想其儀狀、
言笑宛在目前、徐而思之、如風花霜葉、存者無幾、吾兄
于衆人競進之時、雖若少抑、而卒以此全、人之得喪禍
福倚伏之際、孰非天哉、而彼顧置喜戚于其間、非惑耶、
孝孺出處、兄想已知、近於此理、閱之愈熟、居之愈安、每
觀古之名士、少遭挫抑、則戚嗟怨悼、若無所容者、深病
其無識、退之柳侯、文章雖高、然於此道、未有所得、殊可
厭薄耳、吾兄居得美地、義門士友可以往來考質、爲學

著述一事
最忌太早
公自是苦
此語

必進其視索居無徒者爲何如第孝孺近來漸不喜爲
無用之文人有求者非甚不得已未嘗與之于勢要人
尤不喜見杜門謝事欲成一二小書苦於疾疢未能有
成年齒彌長大苟不求古人歸宿之地而效兒女子塗
青抹紅以自誑衰老將至矣欲安所之邪患瘧患眼難
於作字念相與之厚情不可遏聊一言之

荅王仲縉

其三

僕資質不敏明聞道日淺行己之篤不逮古人是以年
益加而智愈昏名益有聞而心益爲之歆然日汨汨與
世伍語默俯仰能自異於流俗者幾希每念昔之聖賢

道德言行之懿、未嘗不內咎而深自慚也。足下在友朋中、最爲相知、且相與最久、不思有以正其闕失、納之于寡過之地、顧以書譽其所未至、而強其所未能、豈僕之所望哉。夫古之著書者、非好爲辭而然也、非慕乎名而然也、蓋以己之所有、無由淑乎人、天之舉以與我者、懼其至我而絕也、故從而筆之於書、而公之于天下、如子思、孟子、周元公之流、其智誠足以知乎道、其才誠足以周乎用、其發之於言、誠足以啟昧幽而垂矩則、且不戾其所爲也、是以學者傳而信之、如龜策、恃而賴之、如稻粱、尊而仰之、如日月、苟爲名而已爾、夸其辭而已爾、如

志之上

揚子雲王仲淹之所述而已爾於道無明也於事無補也揆之於其躬又不能無憾也則亦奚以爲哉僕上之未能學子思孟子之萬一至於揚王之所爲心又不敢以爲可也居則默默以思兢兢以行勉勉焉期不畔乎道而冀其有成使吾學果能成其身乎則雖不著書其所傳者固在使學焉而無以自立于天下縱琢刻其辭其將孰信之僕之不易於言者鄙陋之志殆有在足下未宜以韓退之之事責我也夫退之之重著書有不自滿假之美焉未可深過其過在未聞道而言行未能無可議耳于道有得焉至和充乎中至順達乎外其音聲

問人著書
君可逢人
讀我好著
書皆陋

中乎律、其周旋中乎禮、其取舍好惡是非進退中乎義、
卽之者邪慝消、望之者鄙吝祛、聞其風者相率而化于
善、彌千載而如尚存、若斯人者、何待著書而後有益于
人哉、故顏子嘿然處陋巷、而聖人予之爲羣賢首、其後
若漢之黃憲、言論之存者無片簡焉、當時莫不自以爲
弗及、至于讀其傳者、猶恍然想見其爲人、與憲生相先
後之士、有爲昌言者矣、有爲政論者矣、有爲論衡者矣、
如足下所稱著書三數公、其有益於後世者或有之、而
其人之賢否視憲何如哉、僕少不自量、亦喜有所著、年
長以來、窺見聖賢之垣墻、內顧彌覺不足、非惟不喜爲

亦有所不暇爲矣。每見好名者不度智之不任德之不
類而亟爲言言。徃徃畔於道輒爲之汗下。果使聖人之
道世無知者必待吾言而後明。猶當審其醇疵而後出
之。况斯道自近世大儒剖析刮磨具已明白。所患者信
而行之者寡耳。今世有賢者作當以躬行爲先。一反澆
陋之習以表正海內。庶幾有所益。豈宜復增以浮辭而
長其虛薄邪。足下謂僕所接見者少不能副遐陬僻壤
之望。因欲著書以化之。夫以化當世爲職者。賢士仁人
事也。僕也烏敢當。且賢者能化從已者不能化違已者
仁人能使善者勸不能使惡者變。故孔子至仁也。而化

不行於陽虎武叔。孟子大賢也。而臧倉賤之。王驩怨之。淳于髡輕之。彼一聖一賢。且有所不及。而況纖微昧弱者。顧舉一世而盡化之。以口之不給。而欲假書以傳。僕雖駭其爲計。不宜若是䟽也。且萬世之所共尊。而師其言者。惟孔孟爲然。今問巷庸人。讀孔孟之書。猶不知其可用。或以爲戲笑之資。僕縱著書。其能加于孔孟乎。孔孟不可加。其能庶幾孔孟乎。德道如孔孟。不能必世俗之信。而僕乃欲著其荒言。以化世俗。不待智者而識其難。足下不宜以之相勉也。然足下之心。豈有他哉。乃愛僕之深。處我之厚。而不知非其任耳。雖然。僕非無志於

道者、學道而未至者也、學未至則悔吝不能無過、告不能免、必賴朋友以相成、吾今而後所望以成已者、舍足下而誰哉、幸求所闕、時以告我、則足下所云、化今傳後者、其將有在矣、願少緩之、無以著書爲勸、

答閩鄉葉教諭

予見其文
而求爲之
行國初亦
有北風

郡守王公至、辱示以劉翰林黃伯生所爲詩集序、且俾有述焉、物之美者、無所待於外、有待於外者、皆持不足之心者也、照乘之珠、盈尺之璧、不幸而寘諸泥塗瓦礫之中、其光氣之晶瑩朗潔者、固在及識者得而有之、雖棲之於故篋、襲之以敗絮、連數十城之價、自若也、若夫

藉之以良錦、韜之以文匱、盡飾乎其外而彰其美、以示人、則其中之所存者可知矣。執事之詩、僕雖未獲見而伏讀之、然因二君子之言而求之、蓋可以無待於外者也。苟無待於外、雖二君之言已爲過、而况復有待於無能之辭乎。且古之所謂序云者、蓋以明作者之意、如詩書篇端皆有。小序、而復有大序、加其首者是也。小序或出於史臣、或出於後之賢士大夫。序之作者皆古之聞人。然其中得其言而遺其意、執其意而失其事、徃徃爲經文之累者、亦不爲少。則序之無益、亦已明矣。賢士聞人之爲序、猶不能有益於經、况今之爲序者、能有益於

執事之詩哉。自詩書以下作者莫不有序。或同志者指其德業之所至。或門人故交。發其所蘊。而歎惜其遭逢。初非有求於人。而司馬遷班固楊雄之儔。又直自述已意。以抒其奇偉之才。固未嘗有待於外也。唐人之能詩者。莫如李白杜甫。甫詩當時無序者。白詩李陽冰於其既沒。嘗爲作序。然其有無不足爲二子輕重。而序者反託之以傳。惟韓退之偶然一言推尊五子。至今人誦退之之文。而知李杜之不可及。夫執事之詩。信美而可傳。則不求於人可也。或自序其意可也。以待後之是非。可信萬世。如退之者之一言。亦可也。何其擾擾於世俗之

求哉、且僕少而不專於學、長而奔走於虛譽、無暇以學、及今粗聞先聖人之道、而欲從事焉、其所學既不在乎文、而於文復厭棄不省、故陋於文者、舉世莫僕若也、加之闇昧庸劣、無適時之資、掛名庠序、食斗祿以活養妻子、言不足取信於天下、執事過聽而求之、何爲計之疏也、雖然、今之儒衣冠者不爲乏人、以文辭自任者、麻列于周秦之疆、不彼之求、而於拙訥無勢者有望焉、執事之心、殆非偶然者、僕雖不能言、烏敢卒愛於吾言乎哉、第執事之詩、足以自信、而僕又未之見、且劉黃旣序之矣、是以未能承命、倘未卽見絕、或以草本相示、使得窺

賦咏之大端、庶幾可發舒所欲言、譬猶故篋敗絮、以藉重寶、而增榮、則區區之願也、太守志行甚美、可爲湖學薦紳賀、屬患眼無聊、不能一一、

答許廷慎

往在京師、士人從濠上來者、多能誦足下歌詩、固已窺見胸中之一二、去在臨海、遇林左民張廷璧二子、問足下言行滋詳、二子自負爲奇才、至說足下、輒弛然自愧、以爲莫及也、然後益信所窺之不妄、近在王修德所得所錄文章數篇、及手書、深欲讀之、會僕家難作、未果、寓日輒引去、重入京師、道塗所行千餘里、恒往來于懷、及

不善用其

手則天刑

久之豈止

道感督責

而

龜爲大
龜無爲水
又者所迫

到此獲歲寒事記於友人家覽數行而大驚喜命意持
論卓卓不苟非流俗人所敢望也何足下取於天之厚
至是邪斯文世以爲細事然最似爲天所靳惜其賦於
人也銖施兩較不肯多與得之稍多者便若爲所記臆
時時迫蹙督責不使有斯須佚樂意此理絕不可曉豈
其可重者果在此邪不然何獨忌此而悅彼邪如僕自
揣百無所有以粗識數字大爲所困當危憂兢悚時自
誓欲以所能歸諸造物甘爲庸人而不可得足下幸安
適無所苦而駸駸焉欲挾發竒秘以與造化爭也然其
取忌亦大甚矣得微亦蹈其所忌乎僕雖爲斯文喜然

竊以爲非計之得也。雖然，君子顧於道如何耳，寧論利害哉！自占奇人偉士，不屈折於憂患，則不足成其學，載籍所該，大半皆不得意者之辭也。然後世卒光明崇大，又安知忌之於一時者，非所以爲無窮之幸，而悅之於俄頃者，非甚棄之耶！此可爲足下道，聊以發笑，且自解耳。左民多稱王微仲之賢，恨無由見之。適見其弟晃仲，亦雅士，當是吾輩之秀，大不凡也。僕侍祖母，故來此，其詳有所難言。

答俞子嚴

僕始者知吾兄能文，未知吾兄之心。今得吾兄書，乃知

吾兄之。心果能稱其才也。自宋亡以來八九十年。風俗
變壞。延至於今日。以滋加。天下同然一律。面異於心。心
異於口。諂諛以相容。詭詐以相愚。不知古人之道。何用
於今世也。又不知古人倘在。視今世爲何如也。每深居
沉念。輒用慨歎。曷爲而見古人之遺風乎。今吾子乃能
數僕之過言而規正之。嗟乎美矣。吾子之心。何其似古
人也。僕始爲此言。誠苦於行役而云。未知其過。及告兄
言之。乃知其不能無過也。夫一言之失。未甚也。吾子已
不匿於心而規之。使僕之過有甚於一言者。吾子其能
默乎。僕嘗患無從知己之失。而陷於至愚。今乃有望於

吾子矣。且吾兄在布衣中，不忍欺其友已如此，使有泣
於朝廷，食人之祿，其肯詭隨而爲諛悅以負其君乎？使
爲人臣者，皆不負其君，欲俗之不美，得乎？然則因吾子
之言而稱之爲似古人，未爲過也。雖然，古人之道非但
如此而已也。吾子其益務爲學，而充乎其言，有見於僕
之失，則望以速告僕也。雖不得友乎古人，其尚何憾哉。

傳

孫伯融炎傳

丹陽男

方孝孺

孫炎字伯融，金陵句容人，身長六尺餘，面黑如鐵，一足偏跛，持辨風生，舉辭如雲，人莫當其口，能爲歌詩。元至正中，丁復、夏煜以詩名，炎遊此兩人間，日夜相切劘，益好立機括，下紙可盡，辭采爛然，驚動一時。雅好酒，嘗與煜對飲，務出奇相勝，每得一爽句，拍案大呼，投劍起舞，譁聲撼鄰，所與交皆天下英俊，亦以經濟自負，氣豪才雄，常輕視章句儒。衆中常目許曰：「孫炎男子，豈歿蒿下耶？」會江淮大亂，今皇帝渡江來金陵，聞炎名，召見與語。

累千數百言，大意陳元運將終，勸上延攬賢士以成

大業，義明辭正。上甚悅之，辟爲江南行中書省掾，每

問以事，炎慷慨激切，所謀多合。上心，上愈嘉重，以

爲可用。上親征浙東，炎從行，以勞擢同知池州府，尋

陞知華陽府，皆有聲。已亥十一月，擢行省都事。是年十

二月，會師克處州，擇守者，咸以處在山澤間，盜賊憑結

不解，難其人。上旣才炎，遂以炎爲處州總制，錢穀兵

馬之籍，悉以委之，不取中報，且以勅牒未署者付之聽

其辟任。炎匹馬入處州，時處州外七里皆賊窠，穴獠酋

點蠻狼，嗥虎踞，不奉官府約束。炎至，坐廳事，召城中民

列堵下。諭之曰。元之不爲天祐。人共知之。今四海列爲七八。然吾觀其志。皆無以生民爲心者。得天下者必吾主上也。至今爾民梗化。未知朝廷意味者。猶或握兵戲溝中。自招誅滅。主上不忍加兵。故命我而諭爾民。將以安爾。非厲汝也。爾民審思之。帖帖遵化。則有後福。不然。吾恐爾民將盡爲戮民。叩頭拜謝。誓不敢二心。轉告其鄉民。以孫使君不可翫狎。炎亦下書屬縣。徧諭之。數月皆化爲良民。炎復擇其勇健者。練爲兵將。將教習之。擇其爲衆所服者。爲之長。有寇則率以禦。無事罷歸。爲農。聞有小警。發一符。立至軍門。無敢或有奸之者。強族

此劉青田
之魏無知
也通紀何
爲略之

素驕蹇，皆畏之如神，不敢出聲語。雖在數百里外，亦皆縮氣喪膽。民賴以安。人人謂願得孫使君治吾郡。時秀民有能才者，見方戰爭，勝負未分，皆伏居山谷中，不肯出。炎患之鉤至，一二人問有才者，錄其姓名。爲書遣使者招致之。而故中丞劉基、章溢、知府葉琛皆爲處士所推。基最有名，亦豪俠負氣，與炎類。自以爲不當爲他人用。使者再往返不起。以一寶劔送炎。炎作詩以爲劔當獻之。天子斬不順命者。我人臣不可私受封還之。草數千言，開陳天命，以諭基。文辭甚美。基不答。逡巡就見。置酒與飲，論古今成敗之事。如傾峽，滾滾不休，略無枝複。

基乃深欽歎之。曰：基自以爲勝公，觀公議論如此，基何敢望哉！炎遂致基於京師。上方征伐，無一兵與炎，壬寅二月，賊將李某賀某叛，襲炎。炎被擒，幽空屋中，列卒守之。脅炎，炎始給以生。吾能爲若用。賀李知非其本情，恐留自遺患，以燭雁斗酒噉炎。曰：以此與公訣。炎拔劍割雁，舉卮酒曰：嗟乎！我乃爲鼠輩所陷，爾死，犬豕且不爾食。賊持刀視炎，飲酒自如。賊叱其解衣，炎罵曰：此紫綺衣，主上賜者，吾當服以歿。勿解。引枕而臥。賊不忍，伺其睡，乃害之。時某日也。年四十。事聞，上嗟悼，以某年月日葬於金陵南門外聚寶山。甲辰，贈徵事郎、洪武元

似平報不
酬功○只
薦青田一
爭使足封
侯

年。上卽皇帝位。念宣勞之臣。閔炎歿。義追封丹陽縣男。妻某氏爲賊所擒。不屈歿。炎事親孝。與人交。緩急可仗。遇匱乏者。解衣推食以給之。所著有詩若干卷。其弟子將敬編次傳於世。方某曰。余年十一二時。先君守濟寧間。言炎詩十餘篇。皆豪宕可喜。及觀却寶劍篇。益奇其辭。而炎歿久矣。炎負氣。聽其言。知其爲偉然大丈夫也。故卒以節歿。孟子論學。必曰善養氣。養氣有以夫。

題跋

題神異經

方孝孺

詠諧一宗
流毒頗遠
避世金馬
門中此句
便落詠諧

東方朔在武帝時諫諍似汲黯文辭似司馬相如肆志
輕世曠然有麾斥八極之意去公孫弘輩甚遠特以好
爲詠諧無實之談故爲君子所薄而後之麗辭怪說多
推而歸之士之持身擇術可不慎乎今所傳神異經誕
淺不足辯以朔好怪也人或疑其本於朔然嘗稱淮南
子書而文又陋野其非朔著決也其間有窮奇獸事言
逢忠信之人則齧而食之逢奸邪則擒禽獸而飼之似
有激於志失正者而言之嗚呼世之可怪者獨窮奇

書亦難識
況人乎

也哉

題褚遂良書唐文皇帝哀冊墨蹟

晉宋間人以風度相高故其書如雅人勝士瀟洒醞藉
折旋俯仰容止姿態自覺有出塵意陵夷至于中唐法
度森然大備而怒張挺勃之氣亦已露矣唐初諸賢去
古未遠故猶有晉宋遺風觀褚公所書哀冊豈後人所
可髣髴哉古人所爲常使意勝于法而後世常法勝于
意意難識而法易知顏柳之書余一見卽知其美此書
八九年中凡三見矣今始識其用意之妙正猶有道君
子泊然內運非久與之居不足知其所蘊也

不貶放生
而稱魯公
之辭翰甚
有尺裁

具眼觀之
何待論宣

題顏魯公書放生池石刻

肅宗之放生。煦煦小仁。無足稱者。當時池多至八十餘所。而此碑獨以魯公辭翰而傳。則夫天下之可恃者。果在乎尊榮也哉。公之書。人皆知其爲可貴。至於正而不拘。莊而不險。從容法度之中。而有閑雅自得之趣。非知書者不能識之。要非言語所能喻也。

題朱子手帖

君子之與小人較勝負。於一時則彼常盛。而此常衰。觀是非於百世。則盛於俄頃者。不足以蓋無窮之惡。屈於一身者。未嘗不光顯于天下。蓋時與事錯迕。雖聖賢莫

能達其躬及其勢易而理存人亡而謗息狐狸狗鼠之輩臭腐漸盡而無遺而論議之公終不能掩衆庶之口若徽國文公朱子與西山蔡先生屈於小人之事可見矣文公西山相與講說者孔孟周程之正道而胡紘沈繼祖輩極力詆誣甚者欲寘之於死地西山營道之竄公亦受僞學之目奪官褫秩逐屏從遊之士由小人觀之曲意悖義取媚於權姦以爲朱蔡且將終身名俱滅矣夫孰知二百年之後摧抑困悴者皎乎若白日之當天而鄙陋邪鬼之流以擠排汗鱗爲事者人之視之猶覩不潔之物目憎而氣奪莫不欲戮旣死之遺魄以快

許吳二公
皆難正視

仁賢之憤哉。嗚呼，亦可爲千古之鑒矣。西山之竄在慶元二年丙辰，文公此書不知遺誰，而惓惓欲告郡守，稍寬西山之拘執，師友之義尚可以敦薄夫，而勵末俗，非特字畫之可傳而已也。後之觀者，其尚有所感悟以爲君子之歸也夫。

題桐廬二孫先生墓文後

予嘗論正統以爲有天下而不可爲正統者，三篡臣女，主夷狄也。篡臣女主之不得與於正統，古已有之，惟夷狄之全有四海，創見于近世。故學者多疑焉，蓋蔽于聞見而不暇遐思，遠覽胡怪乎其未之識也。宋德祐景炎

之後縉紳先生往往竄匿山谷或衰麻終其身或慟哭
荒江斷壟間如失考妣而不復有榮達之願者多有之
及其世久俗變然後競出而願立其朝蓋宋之遺澤旣
盡而然也若桐廬二孫公兄弟槃峯公之抗志不汚求
心公之不屑仕進何其凜然可尚也哉富貴之過於貧
賤也遠矣使義可以處之無愧二公奚爲區區踐其所
難而不顧乎蓋必有甚不可者而非知道者不能識也
嗚呼斯理也見于孔子之易春秋者詳矣學者不深考
至於棄君背父陷于夷狄而不自知道之不明其禍如
是其烈也可畏也夫世有知二公之心者其知予正統

之論也。夫表槃峯之墓者黃文獻公爲求心公墓碣者文獻門人王君子充其事已備。故弗論。姑識予所感云。槃峯諱童發字君文求心諱辰龍字

跋劉府君墓碣後

李元賓文學在當時最爲韓退之所推。而退之銘其墓。不過百餘言。稱其美者不過十言。然非元賓莫能當也。古人之文要而不煩也如此。近世銘墓者爲言多至數千。少亦不減數百。否則求者怫然有不滿之色。是豈特文之不逮古哉。習俗之弊也久矣。吾友劉君剛養浩請銘其父處士之墓於太史公公爲之銘。辭約義該得退

處士又得
二字之褒

竟是太平
氣象

之之意蓋欲矯積弊而復諸古也養浩學古而攻其辭
故公以古道處之由是而求處士之爲人其亦古之所
謂善士夫

書浦江二義門倡和詩後

浦陽鄭氏王氏俱以義名門事傳于天下而聞于朝
廷曩歲兩家爲訟者所誣王思敬甫偕鄭氏之長采苓
子訴于朝
皇上重二氏之義詔勿治於是二老人驩然同歸置
酒相勞苦交游之士爲詩以述其事二老人從而和之
讀其辭尊君親上之情戴恩懷德之意藹然溢諸簡冊

問何其美也人性之易感也尚矣綏之以德則驩然鼓舞而和氣生焉和聲發焉至和盈溢于宇內則風雨時萬物遂諸福畢應而治道以成觀二老人之詩當世政治之美從可想見豈特可爲鄉邦盛事而已哉

擇尾之言
至今不死

題米氏山水圖後

附

方孝孺

自古極盛之世天下之間和同無間粹英秀傑之氣充盈洋溢是以賢才之生多駢發遞見父子兄弟俱以所長稱于時者衆矣而宋東都爲尤甚相業功烈則呂氏范氏道德之純則程氏文章則蘇氏曾氏王氏孔氏劉氏其他至不可勝數而米氏父子各以畫名家亦皆擅一時之妙豈人力所及哉天欲固人之國家必生才以植其本使之扶而立之輔而翼之或從而藻繪潤飾之不如此不足以見盛大之美也元輝此圖乃避地新昌時作山川林麓吐吞闔闢有排幹元氣之勢實可與古

昔抗衡不特追配先人而已當人物凋謝之餘洞視今昔慨歎久之

題礪磬子墓碣後

正爲有位者規

士不以得位而後貴也居位而不能行道祇所以累乎位善推其所爲於人雖未嘗有位孰得而賤之乎故因位而著勲業者易不假乎位而德及於人非有志者不能也吾觀太史公礪磬子墓碣礪磬子鄉里一布衣耳凶歲能活數百家遭亂能衛其鄉人於難此其及物者厚矣何必有位哉公之言曰有積無虧惟後之垂礪磬子三子皆才而顯且方以儒術進用於世吾將於是徵

墓碣

王君國祥墓碣

方孝孺

策固奇更
重其不說

金陵王顯述其叔父王君國祥言行授余請文其墓上
之石顯奇士其文辭甚奇至其叔父之事尤奇也余考
之爲之言曰昔嘗讀太史遷書載戰國秦漢征伐攻取
間事必有謀臣辯士之畧參乎其中或以一言脫屠陷
轉敗爲勝或奉文書下十百城國之所由盛強豈特甲
兵足恃哉蓋有文事之助焉近世史所錄名將爭戰之
績則有矣而言辭之士寥濶罔聞豈馳說騁辯者不若
古之人耶抑有之而莫之述也以顯所言王君說元御

非策士也

史大夫福壽以計破取二盜將如探囊。雖然固策士也。哉。而世不聞其名。雖當時人亦不知計出乎君。君說大。夫。時。年。六。十。二。年。且。高。不。喜。名。名。不。聞。於。世。至。死。而。不。悔。古。策。士。能。之。乎。此。其。事。足。稱。矣。君。諱。元。吉。國。祥。其。字。也。曾。祖。君。祥。祖。子。某。父。閏。之。君。兄。弟。三。人。於。次。最。少。而。重。厚。好。問。學。自。幼。奇。偉。喜。兵。家。書。輒。以。其。意。常。爲。人。言。之。人。笑。其。言。之。過。君。曰。君。兄。子。何。足。聞。此。吾。誠。過。也。年。十。四。歲。饑。與。兄。行。糴。旁。縣。道。遇。盜。利。其。粟。將。劫。之。兄。懼。走。匿。君。不。爲。動。徐。給。罵。曰。庸。縣。官。使。吾。運。粟。許。遣。大。防。我。而。不。至。若。豈。防。夫。耶。後。有。粟。車。數。十。兩。若。其。防。後。至。

老盜以爲然散去里中長老固已異之後大夫福壽在金陵盜陳也先潘甲率兵數千自稱爲元帥聲言討賊索軍食城下大言殺人守將閉門伏不出大夫憂不知所爲君造門譌大夫論以禍福說累百千言驚其座人大夫亦驚喜起問計君曰今城中無一軍而盜兵悍甚此難與爭鋒當以計破之盜索芻粟公宜開城門陳芻粟車若將饋之者而陽以好言給之請一元帥以卒來取芻粟彼聞吾言不測吾淺深兩人必相讓則主者必自來吾以計殺之而制其一人易矣大夫從其言旣而潘甲果至執殺之也先失勢亦自敗去君絕不以語人。

又去而之燕秦齊魯之間陰察諸藩預知不足與言復
歸金陵而今上已得江淮卽金陵爲帝都鄉間子弟多
致大官君歎曰人主在吾鄉而吾求之天下吾之命薄
明矣尚多談何爲因噤不更談世事隱醫肆中以自給
刮落銚鏐不露幾微故習恂恂務爲樸事父孝謹友
其兄得恭遜意與衆人處不求其異人莫知其爲奇傑
士也卒以布衣終年三十有九娶平氏一男頓再娶呂
氏生某瑱葬君于某山卒以某年月日以某年月日葬
君爲人敦夙誼知好尚當世名士多喜與交父喪致客
千餘人挾其所長嘗以自高而人莫能高之世嘗謂古

昔能言士多死于言爲奇謀士多以謀敗國因謂皆不
若愚之全此要非篤論彼不善於用各有以取之非智
辯之罪也若君之所蘊而視時察變不以得喪爲累謂
善用其智辯者非耶銘曰言之辯也識又遠也才則孔
豐邦之選也胡閼其逢命之蹇也與時否通義是勉也
不耆其終壽何短也揭昭于幽宮所存者遠也

不替其絲壽而歸也則即于幽宮而待其葬也
豐碑之數也則闕其數而之葬也則葬而葬也
善則其碑碑非碑也曰言之碑也則天葬也木碑其
碑之異也故故之碑碑則葬也則葬也則葬也
故思之金石要非萬歲所不替也所谷亦以知多非
昔指言士多誤于言為壽碑也必以壽碑為壽碑

銘

寧野軒銘

有序

方孝孺

善爲治者常養斯民之質於冥冥之中使之全其性而不鑿其天顓然無思頽然無爲椎魯敦樸而不雜以僞故其民難搖而易化失其道者則不然搔之以智巧而眩之以機變飾之以儀節而淫之以浮華於是天下之文日勝質日媮民始紛紛狙伺乎下而禍亂因之以生太史公班固稱漢文帝之時七八十翁未嘗識市井遨遊嬉戲如小兒狀余嘗思其言而歎其盛蓋自三代以降數千年間俗莫醇於此時者賈誼輩闇於治道猶發

紙在深山
坐明月而
飲醇酒

憤病之斯豈足以知文帝哉以法術治天下固不若以
德化先天下之爲完也是道也惟文帝知之曹參行之
而賈誼非之此賈生所以不逮文帝也哉近代之政去
古遠矣。然其法寬事約有足取者。故方其承平之際。老
成先進之人。皆渾厚雅重。口不出毀訕之言。而身不履
詭激之行。余不及見之。而聞其流風於縉紳間。蓋兵革
之餘。故老無復存者矣。今乃得陳君國大焉。陳君閔習
俗之澆弊。欲以身率之名。其所居曰寧野軒。其意以爲
寧失之於野。可尚哉。其爲名也。昔漢興至文帝。蓋三十
餘年。而後風俗易化。安知今之異於古哉。復先王之盛

殆必有在而君之名室烏知其非兆歟不可以無述也
乃爲之銘銘曰

皇始尚質貴乎自然不忍以文鑿民之天文過爲媮質
甚爲野以媮況野如鄭與雅大雅之音澹泊無華靡曼
嫵都乃聲之邪質直無文其樸則美以飾喪真爲諛爲
詭惟昔有國政簡而章洽于萬邦民俗阜康鉅夫碩人
森列天下推其言行莫匪長者遺澤之傳今也則微不
有善士孰矯循之幽幽斯軒茨戶甕牖其植果蓏其蔭
榆柳豈無藻繪斥而弗施惟野之尚愧不忍爲非無財
智亦有儀度慙乎不文惟野之慕蕩蕩流俗機詐日繁

上下胥欺莫知其難軒有嘉名取則孔遠有來游觀尚
勸爲善

古人之交
聖人之心

祭文天哀辭限公限子天公輒拜天亦拜之思其報
祭太史公三首

方孝孺

丁巳之春公歸金華六月載途公歸于家公曰美哉子
來孔時斯文有傳非子誰宜我觀海內亦有作者非言
之難知道者寡古人爲學惟道是明繫我望子豈以文
名拜公之言服公之德從公三年忘寢與食公曰卓哉
才器之奇加以歲年吾且畏之孰俾師友傳之子孫意
欲甥我以承其門歸告祖母祖母不可吾老娶婦欲其
事我道路阻邈其歸無期且貴非偶汝固以辭此言未
聞公家遘難聞之涕泣夜不能旦百口徙蜀與戎羌隣

重走金華。謀公弟昆欲往省公。中以故止。祖母速歸。得娶閭里。遲之三載。黽勉以從。死生莫知。以此負公公之爲教。必本禮義。違親絕俗。固非公意。公今薨矣。我存何如。所肩忘公有如江河。公之道德未白于世。公之文章幾與公逝。忠公體貌尚寓于夔哀公子孫。桑梓是懷。闡之雪之。俾大以光導之。扶之使之大行。告于天王。返葬以禮。脫其羈縻。使復閭里。或周其難。或開其昏。凡力可爲。不忘公恩。第愚不肖。弗敏爲學。天容地負。懷公奧博。忠義大節。道德大原。庶幾努力。法古聖賢。公之望我。蓋將在此。天未可期。心則已矢。公神在天。亦我之思。我辭。

告公寧不我知。王至國。公東歸。而公之
士不知道。以勢爲榮。天貴不存。寵辱易驚。卓哉先生。洞
鑒千古。駕雲乘風。與造物伍。聖主庸之。掌制玉堂。匪
公之華。邦家之光。羣言讒之。置于巴蜀。匪公之尤。民之
無祿。正襟談笑。瞑目伸眉。浩然無愧。處險若夷。貴賤去
來。靡貳靡忒。孰能與偕。忠信之積。惟公忠信。海內所稀。
謗與身亡。德爲世師。顧余小子。寡聞不肖。茲粗有知。實
公之教。繫官山南。今且八年。公墓在夔。欲往莫前。友生
南歸。舟過墓下。遣致一奠。省視松楸。大江滔滔。惟海是
宗。我心所懷。曷有其窮。

鳴呼務遇合者或貴顯以終身而爲天下之所惡負大名者多困阨於一時而爲後世之所慕蓋利與善不可得而兼而公論必久而後定故也考乎公之平生道德冠縉紳而位與衆人同列文章耀夷夏而家無百金之富卒之速譏遇斥奔走顛沛而死于道路孰不尤聲譽之不祥而取造物之怪怒哉然身旣沒而人主之知愈深家旣破而子孫之守益固是以親王之賢覽遺文而歎息懷舊學而眷顧詢形容於圖像想儀矩於趨步已賜賚乎孤嫠復閔悼其墳墓爲王謀者惜公厭世之太早爲公悲者恨王至蜀之遲暮也夫盛衰禍福之理聖

賢有所不能違惟其旣死而猶存愈遠而見思茲君子
所以異乎衆人不啻若麒麟之於狐兔也某學道無聞
受業有素仰德容之如在嗟歲華之易度兩瞻岷峨濫
跡鵷鷺愛緣丈人之烏術等千金之瓠惟嘉穀與清醕
皆賜物而匪沽上以昭乎厚恩下以寓乎衷懷

祭王博士

嗚呼人之有生何足恃邪始少壯之美好忽衰病之侵
加曾未幾時而俯仰瞬息之間形骸已隨乎物化棺槨
倏掩乎泥沙又俄而過焉但見寒烟夕照宰木喧噪乎
殘鴉蓋生世之不足控持類如此雖聖賢豪傑其德業

明文
卷之九
二十三
勛名可以參天而二地知術政事可以宰制乎衆庶而
安定乎邦家及其終也未始能違乎斯理而吾徒於仲
縉又何爲屢歎而深嗟嗟仲縉子之去我而死一何
速邪憶初見子於烏傷山中妙年白皙宛如處子操筆
吐辭浩然源泉之初發燁若桃李之方葩當時碩儒巨
公莫不稱美愛惜謂翰林君之有子而歎其持節萬里
未返乎荒遐後十餘年名聞四達賢王遣使聘致于藩
國因得覩岷峨之奇峭凌江漢之洶湧求先君奉使之
所衰麻哭踊招徠魂爽于滇池之涯是時年踰三十毅
然有志于古道而入覲王門出教郡學雄文美譽旁流

溢乎邛巴。及今又將十年矣。新天子卽位，召爲博士，遂入辭垣，編摩先朝之實錄，文日以肆，學日以盛，而士之敬慕推許者，亦日以多。自意當聖德顯融之時，太平之期，可望而至，庶幾與子嬉遊於翰墨之林，漸涵乎禮義之域，蒼顏黃髮，同歸里閭，以婆娑。何期一疾，僅融數日，重入子室，男哭袒而女號，嗟呼！履仁有必壽之徵，積善有弗祿之報。以子之先人死于忠國，而子有令德，足以承其遺澤，遽奪以死，兩者不得享一焉。其理則謂之那，豈蒼蒼者不能司禍福之柄，而天道或過差乎？將英才異人，天之所靳，天旣生之，復欲收之，左右以爲光。

文氣似韓

華乎抑所稟者有定分人之不能兼備猶天與之角翊者去其齒牙乎以子之淑明溫厚而壽止踰四十位止登八品何至若是垂也雖然吾觀於世得於天者多則遇於人者必薄厚取於世俗之所貴者其去道也必賒子之所有者辟之球琳琬琰周鼎商彝大貝與丹砂世人欲竊取其錙銖而不可得而子并包並蓄揮揚簸弄接駟而連車所取者不已過乎貪而所得者不亦奢乎如是而又望位高而祿侈天之於人其孰能皆然則其可以不尤乎天而自釋况有男可嗣其學而復有孫矣食也稼穡而杭稻衣也樹藝而絲麻數世享之而有餘

筆端欲停
造化

以子爲富且貴夫孰以爲夸吾所憾者欲蹈道而無補
將聞過而莫予加四海之內章逢之流豈乏其人疇能
如子助我以中正而指吾之疵瑕過子之門腹腸糾痛
而不能已奉一觴而長慟知吾心之謂何

鄭生祐哀辭

台寧海有衣冠之族曰鄭氏顯于宋之季世功德被于
民而名不大著于天下後百年有孫曰祐生而其質碩
厚端秀氣銳而才良好強記多藝能年十四五壯偉如
成人挽疆御悍超捷奇俊雖老將莫不咨賞之其父豪
士善相人每出遊于外歸諦視其姿狀輒歎曰舉莫如

是兒矣。縉紳先生過而見者，亦異之。咸謂必能振其宗，
使充其才氣，將必卓然有所立，而竟以疾夭死。死時年
甫十有七。其生也，非惟其親戚交友愛之；凡見之者，亦
與親戚交友同其愛；其死也，非惟其父母昆弟哀之；凡
識之者，無不哀其不幸而哭之。失聲。世常疑天人之道
好違而難合，人之所愛者，天必艱其生，所甚愛者，生之
艱也，爲尤甚焉。至於鳳鳥、麒麟、珍瑋、異之物，愛之者，
彌衆，則或曠四海，歷千載，而不一生；而凡爲人所憎疾，
厭苦者，不植而自長，不育而自蕃。若恒有以相之，其於
人也，器童惡子，狼戾恣睢，以病乎人，雖其父母亦以其

速死爲幸者則壯盛而無疾貴富而得志稍有才質爲
世所愛慕者輒遇禍患不獲與庸衆人等豈天之愛惡
與衆人異趣哉是未可知也或謂人之愛斯人也必欲
常見之暫離而不見則思天之於人也亦然聞其美也
則愛之愛之甚則不欲去乎左右故嚚且惡者多存乎
固而俊哲之生也恒難其全是則天之愛人者乃所以
禍之豈理也哉若鄭氏子才質之美爲人所竒愛而竟
不永年推之於理莫知所由致也豈天者固有所難知
而美好術智端爲致禍之具耶使美好術智者不夭折
而底于成其福乎斯世也大矣然則鄭氏子之可哀寧

獨其家與其身也哉凡有志於斯世者皆宜悼其不幸也余與之有連而不識其爲人旣聞而哀之復重之以辭且以慰其父云氣渾判兮挺英特姿鸞麟兮貔虎力綽秀姣兮燁若神巧言笑兮肅而溫未加弁兮突修鉅衆咸慕兮莫敢侮嗟靈淑兮天所讐子美好兮死誰尤旣聰達兮又慧哲超幾先兮燭眇忽覩簡策兮目電光心下屬兮久無忘學之篤兮藝孔有弦強兮轡良馳馬叱咤兮矢交飛殲糜豕兮載歸萬夫駭兮力不格古有儼兮今焉索天所喜兮才藝精詔子歸兮難久生彼閭昏兮稔姦慝人老死兮人孰戚子不幸兮少恢音躬天

以見女語
寫壯士心

折兮令世悲死非鮮兮貴不柄天可壽兮奚以老嗟子
死兮勿尤天天茫茫兮曷憎憐來奚爲兮去疇往英靈
滅兮將安放前千祀兮後無窮賢不遇兮古所同

吳氏二賢母哀辭

永興吳君荃母林年二十二夫亡亡一月生君甫彌月
大父繼沒大母胡與林晝夜苦誓保持遺孤強暴欲脅
娶林林負兒與姑逃稍長鬻簪珥資其就學學垂成而
林卒胡督之益力于是吳君爲知名士吳氏宗賴以弗
墜予謂託孤寄命丈夫所難而二母能之因爲辭以宣
其哀辭曰木則有枝兮婦則有夫嗟我二婦兮獨何孤

夫兮謂何兮子猶在腹爲雌爲雄兮吾將誰卜子之生
兮幸非女朝哭夫兮暮抱兒乳夫有知兮無知相見兮
上續遺緒夫雖死兮舅在堂子生彌月兮舅亦云亡姑
哭舅兮又哭子撫厥孫兮涕泗其滂我二婦兮何爲守
空幃兮夜淒淒涼風慘兮中人蟋蟀鳴兮兒夜啼撫枕
兮太息起繞牀兮淚沾臆夫死有言兮耳猶聞吾兒不
育兮吳鬼安食婦辟纊兮姑抱兒吾兒雖微兮吾夫在
茲孰謂余兮荼蓼余甘之兮如飴彼何心兮狐鼠乘餘
孤兮謀覆吾祀跳梁瞰室兮嘯衆以呼謂余榮兮將焉
與處山之石兮巍巍海之水兮靡有涯水可竭兮石可

移身寧死兮節不可虧。襁吾兒兮我負來何難兮。去何阻。夫有神兮願爲虎身。寄虎腹兮免人余侮。諒一死兮何難。志未伸兮魂魄靡安。姑壽康兮子苟能養。瞑余目兮從夫九泉。我姻兮我姪。憫余孤兮余舍昔妾媵兮如雲。今隻影兮燈夜。汲澗兮手龜抱薪兮棘裂我衣。首如蓬兮誰理。未亡人兮何有容儀。袖簪兮脫珥。揭羅襦兮裂文綺。粥之兮爲誰式教兮我兒嗟我兒兮勿怠荒爾祖爾父兮厥聞孔彰。我不死兮爲爾之故。爾能立兮爾父不亡。夙出兮暮歸不眠兮達旦。勿謂母貧兮儋石無儲。吾兒讀書兮我寧不飯。見踐兮毋言焚膏繼晷兮以

歲以年年忽及兮加冠文之聲兮爛然婦於姑兮相與
吳之先公兮庶幾無餒感昔兮念今一悲兮一喜兒奉
觴兮綵衣翩願壽兮如彼南山將竭力兮終養母忽逝
兮不還姑撫婦兮泣嗚嗚曷不爾兮死無衰殘兮不死
爾盛年兮罹此毒痛孫悲號兮奉大母有孫存兮大母
無苦大母無子兮孫無父孫多材兮善奉甘旨嗟二母
兮亦孔之難誓死撫孤兮身死志完引千鈞兮一髮以
手障兮驚瀾二母死兮不死有子甚文兮善在國史國
史旌銘兮五色有煒下燭泉扃兮上薄星紀彼何人兮
豔婦夫屍在牀兮笑言詡詡傾人宗兮殞人祀地下逢

之。今。額。汗。猶。泚。嗚。呼。哀。哉。家。有。婦。今。國。有。臣。婦。死。以。姑。
今。臣。死。以。君。胡。獨。二。母。今。吳。祀。是。存。嗚。呼。胡。獨。二。母。今。
吳。祀。是。存。

文以肝胆
爲色澤

祭太史公

方孝孺

鳳飛赤霄。百鳥朝之。或集于枯。鸚雀嘲之。蛟龍天遊。雷
雨九土。一或泥蟠。蛙蚓獻侮。古之賢豪。身居廟堂。老倪
稽首。望其餘光。一朝失勢。遭讒遇斥。羣兒樂禍。謗毀山
積。惟太史公。間世之英國之耆龜。人之典刑。洪武初載。
光膺天寵。名聞夷夏。內外風動。衣冠如雲。趨拜于門。有
得一言實若。璵璠不幸。西遷瞑目。江溼鱗蹄。而亡羣犬
交吠。物之見怪。以異於常衆人。不知吾道。乃光賴茲賢
王誠明濬哲。興懷先正。追悼黃髮。意欲起公。論過規失。
每觀遺文。軫卹。煢獨惟君知臣。惟賢知德。王言旣出。讒

視操如鬼
鬼又應之
鬼復遭鬼
聲氣應求
鬼亦有焉

如自息公之名績終古不磨鬼。憐。紛。紛。如。日。月。何。小。子。
無能蚤承教育不鄙其愚千載是託歲月遄邁忽二十
年志大無成懼辱公門俗論之悲夫豈待辨九原聞之
當笑其褊青城蠱天羣仙所都公神不亡其在茲乎

祭宋仲珩

嗚呼死生一塗禍福一門欲知得失視其所存違道而

生與死何異孰謂不亡死而無愧惟予仲珩俯仰不慙
求之當今曾不二三况有文章才藝之美能知子名蠻
夷婦女子壽雖短所傳甚長儼乎若存不見其亡世豈
無人尊榮壽考死無足稱猶賤而天鄙夫無知右彼左

此可謂麒麟不若狐鼠古之論人志行是觀吾於所遇
匪人由天天之使然聖智莫易豈其不能時有順逆仲
由醢死宰予族夷衮衣大圭爲百世師曰恒孔惺盜國
欺世一時卿相千古狗彘子之獲譴或搆以罪子則已
矣彼亦何在乃知小人徒爾紛紛毒機旣發反中厥身
戕善疾能百鬼所殛灼刺鞭箠俾爲虺蜮子之端直當
爲明神駕風乘雲麾斥無垠浩然自得何所不可下視
斯世汨沒膏火子當哀之吾敢子悲交游淪喪將誰與
依自聞子心疑未決不見來歸乃抱子骨仰天驚號
胸膺欲裂垂仁負義羞愧天日子家太史視我如子難

質言

不能救貶不能侍天實知之我爲何人尚有可勉以贖
前愆撫孤教子使不失所傳道立名耀于終古我雖不
肖誓不敢忘施重山嶽報微毫芒成否在天匪謂必能
苟有所立斯言可徵子大夫人墓于羅山吾欲拊之俟
太史還從兄不可歸骨金華尚寧其居子故所家親友
祖奠告以吾言匪特子知天實與聞

明文奇賞卷之十

史官陳仁錫明卿甫批選書

雜著

瞽說

蘇伯衡

空同子過北邙山見叢塚爲喟然而歎曰人乎人乎其
王侯將相乎其巨家富子乎其百工技藝乎其俠客釋
氏乎其駟僮乎其毗隸乎其操瓢者乎其人奴之類乎
其鹵簿鼓吹前挽後擁而歸之斯乎其束縛而遺之斯
乎其殛而埋之斯乎其始將錮三泉而天文地理之畢
具乎將便房繳道門闕墨愚之極其壯麗乎將秘器臣

妾之備置乎將穿不及泉而丘壟之無處乎將不封而
不樹乎其中將珠孺玉匣黃腸題湊乎將桐木爲棺葛
藟爲緘乎將厚衣以薪乎將裸而反其真乎嗚呼噫嘻
蓋皆不可知矣况乎其主名邑里而可得而稽乎但見
華表摧折穹碑剝落土花磷磷牛羊礪角可悲也夫牧
豎縱橫汎掃不至漆燈已滅陰燐昭矚可悲也夫蒿萊
沒垣麒麟歎側翁仲無言白日自沒可悲也夫衰草離
離露冷風淒罔象出沒狐狸嘯啼可悲也夫言未卒倏
有樵者曰唉又何足悲哉人齡踰百如電之流如駒之
馳方其生存或窮或達或盛或衰而貴者賤者尊者卑

者富者貧者智者愚者雖歡欣得失用舍夭壽參差不
齊及大期之奄及倏長逝而莫追計如桑孔辯如秦儀
雄如項籍巧如工倕腰懸章綬手執璧圭布視錦綉塊
視珠璣雖欲不同爲螻蟻之歸得乎唉歲月荏苒寒暑
推移則其骨毛齒爪亦將漸盡而塵飛頽然獨存者第
敗塚之纍纍而已而四五世後不復能守則丘塋塋域
又將爾耕而我犁蒼然如故者特空山之巍巍而已而
此理勢之必然從振古其如茲夫子何乃不能忘情爲
之佇立而歔歔也雖然萬物之間衆人之中維賢維哲
立德立功坤翕乾張蟠地極穹有生有死雖衆攸同其

英。蒐。靈。氣。則。不。隨。草。木。而。腐。壞。其。令。聞。廣。譽。則。長。並。天。
地。而。無。窮。苟。能。如。是。則。善。矣。尚。何。彼。之。悲。爲。唉。宇。宙。有。
不。朽。而。不。務。之。方。蠅。營。狙。詐。舞。智。用。機。競。浮。榮。於。旦。暮。
較。強。弱。於。鎗。銖。俯。有。拾。仰。有。取。爭。勢。利。計。崇。庫。將。其。肉。
未。寒。而。名。已。泯。何。舉。世。之。沒。沒。蚩。蚩。也。空。同。子。曰。善。哉。
去。其。健。羨。脫。其。放。羈。放。乎。山。林。弦。琴。誦。詩。進。德。修。業。惟。
恐。後。時。

海。賈。謂。漁。者。曰。我。之。賈。於。江。海。也。大。舟。如。山。後。不。見。前。
檣。高。入。雲。航。廣。彌。天。奇。貨。異。寶。填。委。其。間。真。臘。流。求。川。
蜀。荆。蠻。乘。風。駕。浪。朝。往。夕。還。獲。利。至。速。以。博。用。力。至。逸。

以安爾何不操我之舟以利天下以濟不通乃駕解艫而浮游溪澗之中低桅短蓬坎窪其容輕如浮梗迅若飛鴻倏依淺瀨忽緣長飢槩蕩乎浦溆之裔纜繫乎蒲葦之叢舉罾得蝦投竿取鰠以給衣食以活妻孥抑何陋歟抑何愚歟漁者曰貨寶者盜賊之餌也江海者風波之區也分薄而利厚未有不困者也力小而圖大未有不危者也與其冒風波之險孰若卽安於浦溆之有餘與其懷盜賊之憂孰若取足於魚蝦之無虞大舟之利吾豈不知顧力有所不足而分有所拘耳使吾舍漁又何覲覲乎乃歌曰吾舟一葉今可安居今我魚數寸

明
今可克虛兮候之豐兮憂之大兮我何以涉江海爲爾
毋我愚兮我寧爾隨空同子聞之曰漁者其賢乎夫能
量力者必守已能知分者必安命必安命則不貪守已
則不競不貪近乎仁不競近乎義義且仁漁者果賢乎
使人皆爾也又何至冒利而黷貨希寵而徇世輕性命
而履危機昧廉恥而卽污穢皇皇而不知老役役以至
於斃也哉

尉遲楚好爲文謁空同子曰敢問文有體乎曰何體之
有易有似詩者詩有似書者書有似禮者何體之有有
法乎曰初何法典謨訓誥國風雅頌初何法難乎易乎

主意只是
達字而
汪洋出之
爛若布錦

曰。吾。將。言。其。難。也。則。古。詩。三。百。篇。多。出。於。小。夫。婦。人。吾。
將。言。其。易。也。則。成。一。家。言。者。一。代。不。數。人。宜。繁。宜。簡。且。
不。在。繁。不。在。簡。狀。情。寫。物。在。辭。達。辭。達。則。二。三。言。而。非。
不。足。辭。未。達。則。千。百。言。而。非。有。餘。宜。何。如。曰。如。江。湖。何。
也。曰。有。本。也。如。鍵。之。於。管。如。樞。之。於。戶。如。將。之。於。三。軍。
如。腰。領。之。於。衣。裳。何。也。曰。有。統。攝。也。如。置。陳。如。構。居。第。
如。建。國。都。何。也。曰。謹。布。置。也。如。草。木。焉。根。而。榦。榦。而。枝。
枝。而。葉。而。葩。何。也。曰。條。理。精。暢。而。皆。有。附。麗。也。如。手。足。
之。十。二。脉。焉。各。有。起。有。出。有。循。有。注。有。會。何。也。曰。支。分。
派。別。而。榮。衛。流。通。也。如。天。地。焉。包。涵。六。合。而。不。見。端。倪。

何也。曰氣象沉鬱也。如漲海焉。波濤湧而魚龍張何也。
曰浩汗詭怪也。如日月焉。朝夕見而令人喜何也。曰光
景常新也。如煙霧舒而雲霞布何也。曰動蕩而變化也。
如風霆流而雨雹集何也。曰神聚而冥會也。如重林如
邃谷何也。曰深遠也。如秋空如寒水何也。曰潔淨也。如
太羹如玄酒何也。曰雋永也。如瀨之旋如馬之奔何也。
曰回複馳騁也。如羊腸如鳥道何也。曰縈迂曲折也。如
孫吳之兵何也。曰奇正相生也。如常山之蛇何也。曰首
尾相應也。如父師之臨子弟如孝子仁人之處親側如
元夫碩士端冕而立乎宗廟朝廷何也。曰端嚴也。溫雅

也。正。大。也。如。楚。莊。王。之。怒。如。杞。良。妻。之。泣。如。昆。陽。城。之。戰。如。公。孫。大。娘。之。舞。劍。何。也。曰。激。切。也。雄。壯。也。頓。挫。也。如。菽。粟。如。布。帛。如。精。金。如。美。玉。如。山。水。芙。蓉。何。也。曰。有。補。於。世。也。不。假。磨。礪。雕。琢。也。將。烏。乎。以。及。此。也。曰。易。詩。書。二。禮。春。秋。所。載。丘。明。高。赤。所。傳。孟。荀。莊。老。之。徒。所。著。朝。焉。夕。焉。諷。焉。味。焉。習。焉。斯。得。之。矣。雖。然。非。力。之。可。爲。也。聖。賢。道。德。之。光。積。於。中。而。發。乎。外。故。其。言。不。文。而。文。譬。猶。天。地。之。化。雨。露。之。潤。物。之。魂。魄。以。生。華。蔓。毛。羽。極。人。力。所。不。能。爲。孰。非。自。然。哉。故。學。於。聖。人。之。道。則。聖。人。之。言。莫。之。致。而。致。之。矣。學。於。聖。人。之。言。非。惟。不。得。其。道。

頁一無恒
無事可做
無以可交

并其所謂言亦且不能至矣尉遲楚出以告公乘丘曰
楚之於文也其猶在山徑之間歟微空同子導吾出也
吾不知大道之恢恢於是盡心焉將於文間焉無難能
者矣

空同子曰有求於人而不加親無求於人而不加疎此
其人君子也有求於人而惟恐不親無求於人而惟恐
不疎此其人小人也其人誠君子也其友也必不加親
於人得時之際而加疎於人失時之後亦不加疎於已
得志之日而加親於已失志之時其人誠小人也其友
也必加親於人得時之際而加疎於人失時之後亦必

加疎於已得志之日而加親於已失志之時是故君子之友謂之真小人之友謂之僞僞友者常多有也真友者常鮮有也鮮真友是以友而有始終者十不能一二也多僞友是以友而無始終者十常有八九也蓋君子友以道義而道義無隆無替者也與道義俱無隆替則君子之心也小人友以勢利而勢利有隆有替者也與勢利俱其隆替則小人之心也此小人之存心所以無恒而君子存心所以有恒也以有恒之心而與人友雖禍福死生而不能親疎之也况小者乎以無恒之心而與人友雖簞食豆羹而能親疎之也况大者乎是故君

子不苟交人亦不苟友於人友人必察其所以友也友
於人必慎其所以友也。慎友在始察友在微。察友不於
微則不能得其心之所存也。慎友不於始則不能得其
身之所宗也。夫自古及今終而相伎相軋相毀相競相
傾相仇相殘者皆始而相求相推相下相比相濟相依
相許者相求相推相下相比相濟相依相許於其始而
相伎相軋相毀相競相傾相仇相殘於其終。僞友者則
爲之也。真友者固不爲之也。故君子察之慎之友焉而
出於真者則內友焉而隣於僞者則絕絕。僞友所以率
天下薄勢利也。內真友所以率天下敦道義也。敦道義

薄勢利民德其有不厚乎友道其有不終乎齊王問陳軫曰大臣竊權重以作威福何自知之軫曰此非微臣之所知也雖然臣乃者過淄水淄水上有兩叢祠水東之祠人持酒脯饗之者終日不絕水西之祠終日未嘗見一人饗之以酒脯者問其故其一神能爲禍福其一神不能爲福亦不能爲禍今夫大臣者神叢也大臣之門神祠也持酒脯者趨勢利者也王欲知權重之所在亦惟觀酒脯之所在而已矣王曰善明日朝羣臣問曰淄水上有兩祠有諸對曰有之其一徼福者如市其一無一人徼福者有諸對曰有之此何以故對

曰、自、其、能、降、災、降、祥、與、不、能、降、災、降、祥、故、也、今、公、門、可、
羅、雀、而、諸、大、夫、門、車、轂、常、擊、其、無、乃、似、之、乎、羣、臣、咸、畏、
而、莫、敢、對、君、子、曰、陳、軫、之、取、譬、也、善、矣、而、齊、王、之、詰、羣、
臣、也、則、過、矣、夫、亦、自、強、而、已、耳、湯、武、之、朝、不、聞、主、柄、下、
移、伊、周、之、佐、不、聞、執、國、之、命、已、不、自、強、而、惟、患、政、不、自、
已、出、授、人、以、大、阿、而、欲、無、其、割、得、乎、

志殺虎

余至高溪之七日有虎夜踰某子甲垣攫其豕豕咻然
作聲甲意穿窬也亟舉火燭之不見豕而見虎迹焉黎
明與二弟俱躡虎迹覓豕行至黃土隴見兩虎叢薄中

呼曰虎在此虎在此鄉黨隣里幸與我共殺之不者不
惟吾豕被其攫諸公家之豕亦恐不免不惟豕不免害
且恐及人於是環高溪一聚壯者操刃與挺弱者聲銅
鐵器往助甲虎見衆前且行且咆哮作聲威翼以懼衆
衆不威懼益鼓譟環之虎乃躍而起甲之長弟遽揮挺
摘虎虎怒爪之其右股被剗甲之幼弟奮戈刺之自喙
貫脇一虎隨斃其一猶咆哮作噬人狀然聲戰慄僅若
牛鳴衆知無能爲也直前刺之於是兩虎俱斃剗其腹
豕固在也虎於毛蟲中最暴戾人聞談虎且猶膽掉畏
之而况敢攫之乎使其據深山大谷雖日攫麋鹿雉兔

戒貪勸弟
獎功數行

轉折

以自肥孰得而斃之哉。顧恃其暴戾縱逐逐之欲入墟
市攫人畜而弗忌得一豕竟殞其命悲夫世之人自謂
威權足賴而貪欲無顧忌者其亦所知鑒也乎方甲行
覓豕惟二弟從率先衆人刺虎亦惟二弟詩言外禦其
侮必兄弟豈不信矣哉甲喪其豕旣而斃兩虎誠若快
意者然爲酒食以勞鄉黨隣里費抑亦夥矣一弟又幾
不脫於虎口持虎皮上送官人莫不謂其得厚賞以其
皮之傷也牽於吏議迄弗之賞然則出死力捐家貲以
除暴虐者上功幙府而欲文法吏無吹毛求疵而欲沾
賞典矧可得乎矧可得乎

序

送歐陽公輔序

蘇伯衡

春功多識

天射下字

入

故大司徒楚國歐陽文公起自休致拜翰長之明年伯
衡舉進士至燕因得拜公于崇政里第還復得與公之
孫公輔遊公輔主長伯衡一年聰敏未之或先朝夕綜
理家政裁答書疏賓禮門客間則讀書爲文不遑頃刻
自逸伯衡見之未嘗不羨且愧也別公輔南歸未幾而
兵興出處之不知且十有六年國家底定燕冀公輔
來南復相見乃知公輔積官至中書左司都事而於當
世之故益熟矣嘗與之論元社之所以屋雖天命而致

之豈不由人乎哉。天曆元統以來海內無事士大夫安富貴而養功名職于郡縣者以將迎爲要以依違爲賢以漁獵爲務而司憲度者亦皆保其祿位顧其妻子類欲樹私恩爲自完之計其低徊澀縮苟且歲月不以是是非非爲意者則號識大體而尤見重上下相蒙政以賄成馴至至正間變起意外而遂莫之支焉然則其亡也天邪人邪必有以辨之矣。於戲公輔真知言哉。今年春公輔采史家事自北平山東還而陝西按察僉事之命下且行欲得一言爲贈伯衡竊謂君子之爲國也猶鑿師之治病也。今夫鰕之瘠肥氣之虛實病之深淺凡

爲鑿者舉知之而不能療療之而不能已則由其不知
病之所在與夫治失其方藥之不得其良也有鑿師焉
切脉而灼知其病治之有方投之良藥固不待煎洗割
解而愈矣曾謂爲國而異是乎聖天子起民間混一
四海慨然思革前代之弊于是簡拔人才分布郡邑而
寘諸風憲則其尤者也而吾公輔與焉公輔侍文公自
蚤歲所接識皆朝之耆老成人所聞皆康時之略所學
乃聖賢之道而又養之以歲月習之以世故迹其言論
譬諸鑿師盖不惟素蓄良方善藥抑亦知病之所在矣
雖以之爲國無難也而况一道乎書曰商俗靡靡利口

惟賢餘風未殄君其戒哉夫君陳尹東郊時殷之爲周
久矣而其言且如此矧今秦雍內附未久也則向之吏
習庸詎知不有存焉者乎申明
德意作新之伯衡於
公輔有望焉

題

題鄭宣撫墓誌後

蘇伯衡

伯衡竊聞公宣撫川陝節制諸將嚴甚吳璘而下每入謁必先庭參然後入就坐一日璘持少保來謝語主閤吏欲講鈞敵之禮吏以白公公厲聲曰少保官雖高猶都統制耳倘變常禮是廢軍容少保若欲反則可取吾頭去庭參之禮不可廢也璘皇恐聽命時諸將咸陽憚而陰忌之始見公擢自溫州通判不數年登禁近以資政殿大學士帥蜀意公秦檜之黨也雖忌而莫敢出聲後見公遇事輒與檜抗知非其黨也乃譖之檜言其有

讀史千秋
有不平

跋扈狀檜入其言謀于王喚喚以爲不若選一宗室有
風力者徃制之因薦趙德夫於是創四川總制財賦以
命德夫德夫至坤維辟晁公武榦辦公事且屬其物色
公陰事公武起久廢又引公所逐使臣魏彥忠者相與
盡力擠之遂興大獄而公竟謫封州以歿於戲正人之
不能獨立從古則然豈獨公乎且公帥蜀八年欲加之
罪何患無詞而况諸將忌之於外宰相銜之於內迎合
徂伺於前後左右者又其仇人此固司馬溫公所謂獨
一黃葉之在風中也雖欲無危其可得乎偶觀墓誌文
輒疏所傳聞于後以補其畧亦以見羣枉害正其勢蛇

蟠蟻結牢不可破如此可畏也。

論

樊噲

高 啟

樊噲武夫也嘗携劒摧鋒從沛公以芸菑墾害人所壯
之者不過以其能脫戲下之急爾余竊以噲有可賢者
焉初沛公之入咸陽也見秦之宮室帷帳寶貨婦女欲
畱居之因噲之諫遂遷屯霸上不然則逸欲遽生蹈亡
秦之覆轍何以慰父老之心起范增之畏而解項藉之
怒乎恐漢之爲漢未可知也史言當時諸將皆爭取金
帛財物蕭何獨先入收丞相府圖籍藏之觀噲之能諫
上則其不爲是可知矣及高帝旣老嘗有疾惡見人詔

比鴻門排
闥難矣

戶者無得入羣臣何雖爲相亦莫知爲計也噲排闥而
入見上獨枕一宦者臥因流涕以片言悟之其憂深慮
遠有可爲大臣者矣豈絳灌等比耶而或者乃以帝嘗
欲殺噲恐百歲後呂氏叛也嗟夫噲起屠狗以至封侯
亦足矣况其賢如是乎且帝素少恩又何有於一噲論
者誠刻矣哉

序

贈錢文則序

高啟

韓文公詩有曰我生之初月宿南斗蘇文忠公謂公身坐磨蝎宮故而巳命亦居是宮故平生毀譽頗相似焉夫磨蝎卽星紀之次而斗宿所躔也星家者說身命舍是者多以文顯以二公觀之其信然乎余後生晚學景仰二公於數百載之上蓋無能爲役而命亦舍磨蝎又與文忠皆生丙子是幸而偶與之同也二公之名雖重當世而遭逢排擯謗毀幾不自容仕雖嘗顯於朝而貶陽山謫潮州竄逐於羅浮儋耳之間踰嶺渡海冒氛霧

而伍蠻蜃其窮亦甚矣。顧余庸庸，雖不能致盛譽，亦不

爲排謗者所及。况遭逢

聖明，忝職

禁署，蒙

恩賜

還，無投荒之憂，是幸而不與之同也。然二公之文章德

業，赫然昭映千古，而余早罹艱虞，中事奔走，學不加修

文，無可采，將泯焉爲衆人之歸，是不幸而不能與之同

也。噫！命之所舍，旣同，則宜無不同。而何相去若是之遼

哉！蓋窮達得喪，由乎命；智愚賢否，存乎人。存乎人者可

爲，由乎命者不可必。世之人常以不可必者責之命，而

不以可爲者責諸已，所以多自恕而倖得也。若二公者

其道同，其文學同，故毀譽窮達有不必其同而自同，則

觀李廼受
刑可以知
命矣二公
若其亦幸
而不與之
同

余之不能與之同者蓋有在也而豈命之罪哉山陽錢
文則能推星以言人之禍福無不奇中士大夫多稱道
之將遊湖海徵余言爲贈因書所以自警者貽之且使
遇夫自恕而倖得者告焉文則讀書好修善鼓琴斯直
其餘事云

贊

義鸛贊

并序

高 啟

吳報恩寺浮屠之顛有鸛二巢焉以遊以宿出返必
俱一日其雄望脰輪索中奮翼自擲空懸弗脫雌下
首大鳴若籲于人衆憐之莫能升遂宛轉而絕雌依
其傍弗去羣鳥欲磔之輒引喙怒逐不使近逮毛骨
盡化乃已余居直寺東嘗見其彷徨飛旋形貌慘悴
風雨之夕哀唳嗷嗷若號慕然余念夫世固有伉儷
相悅者矣一旦失所天哀未改而已他適塗膏自媒
唯恐非艾晨咷夕噉曾無含恤世嘗以禽喻惡人寧

不辱是鸛哉、廼贊曰、

嗟爾鸛乎、維鳥之特猗、雄死自守、禦鳥之賊猗、獨棲于
標、夜失其匹、倚哀嘶、返顧不啄而食、猗厥質始化、豈貞
之鬼猗、匪曾黃鵠孰配爾德猗、

露布

擬唐平蜀露布

高 啟

高公八而
才不爲馳
騁國初之
文如此

神策行營節度使東川節度副使臣崇文等臣聞天無
二日臨四海爲一家地有九州分萬邦爲五服故用建
侯藩之重俾扶王室之尊車服出於堯庭篚筐歸於禹
貢柔遠能邇舞干羽開未格之心取亂侮亡鳴鼓鍾計
不恭之罪蓋法陰慘陽舒之道成文綏武定之功於是
臣職惟修君威罔替上稽象緯固昭弧矢之名下制國
經可廢甲兵之後伏惟皇帝陛下神凝至道氣稟英姿
紹十二世之洪基啟億萬年之昌運閔生民之未乂惻

然如傷念祖業之惟艱凜乎若墜却遠方之獻不嘉有
瑞罷別庫之藏以示無私象郡鰲溪流入人而姦邪並
黜麟臺鳳閣命二相而賢俊同升屢降璽書體乾行而
布澤大蒐戎輅應月蝕以修刑冀垣跋扈之臣解甲方
歸河隴憑陵之虜納琛會至而劉闢者性惟狂戇位在
凡卑寔爲掌賦之瑣材豈是總戎之偉器頃因西川節
度使韋臯卒遂擅留府不受徵書當陛下光臨率土之
初大賚多方之始恐生震擾姑務包容授之以非闕之
旌旄委之以西門之管鑰可謂滌瑕蕩垢荷寵蒙榮不
思感悔以酬恩反思驕淫而速禍此軍未輯他鎮仍求

神奪其聰礪刃拒賓僚之諫天盈其惡奮戈驅將士之行始西蜀自縊其鴟張後東川竟遭其獸噬謂偏隅可據謂重險難踰負固偷生欲效李流之逆望風走死不知譙縱之窮陛下乃用旁詢將興薄伐築室匪衆言之惑負辰唯獨斷之明大衆啟行常勗之以用命小臣受事敢效之以忘身率五營虎衛之師會數道鷹揚之將駢脅者盡操闌戟蓬頭者皆垂纓胡霧合雲屯日蔽旌旗之景波翻瓦振耳聾鉦鼓之音六月臣與兵馬使李元奕山南節度使嚴礪等進至鹿頭關東此關旁夾高山真成巨障阨三軍而莫進詎下井陘立一夫以可當

應同劍閣。臣等猿攀魚貫，耻鑿道以潛行。鳥突虵蟠，徑焚廬而直進。因地形而制陣，以方以圓，察敵勢而設奇。或前或後，闢不束身，以就躡。更舉臂以當轅，臣乃仗鉞誓師，援梓率衆一麾而闢心已厲。再鼓而銳氣不衰，樓煩發矢射雕之弓，洞胸貫髀，飲飛擊斬，蛟之劒，蹀血橫尸，疾呼作動地之聲。大戰奪漫天之險，逆不干順，知賊旅之方崩，弱豈當強。喜我軍之累捷，欲藉長驅之勢，遂救淨掃之功。九月，河東牙將阿跌光顏將兵來會其部，曲皆羗胡猛士，并晉健兒，蹀勁弩而力透重犀，被長鎧而走追奔馬，欲贖後期之罪，請當前拒之鋒。累出傍抄。

獨行深入遮賊轉輸之路斬賊飛走之關於是錦江之
諸郡皆降成都之孤城益急臣乃乘其已困大舍嚴圍
鼓角初鳴守埤者心皆不固梯衝未設攀堞者身已先
登九却九攻墨子之機安在八陣八克吳公之績乃存
其劉闢鹿窮不暇於擇林鼠竄尚思於求穴始將出遁
漏跡網之高張終被追擒就長繩之急縛端門受獻卽
當檻送於宸京大社行刑不使逃誅於絕域臣已撫平
蜀境入駐通衢除叛賊將刑此外其染汙者本是良民
迫脇者無非叛黨悉加慰撫並用赦原莫不瞻聖日以
歌謠被王風而鼓忭修武侯之政已罷卒以營農復文

翁之規更興儒而舉士。大地灑清塵之雨。溥降深恩。洪
溟息鼓浪之風。頓消芥怒。此蓋神謀睿算。天贊奇功。使
海內知惡臣之易亡。識尊威之難抗。臣等幸陪是役。獲
覩茲休。不任慶快之至。謹奉露布。以聞。其軍資器械。別
簿錄上。

雜著

書博雞者事

高啟

好官有所
州

博雞者袁人素無賴不事產業日抱雞呼少年博市
中任氣好鬪諸爲里俠者皆下之元至正間袁有守多惠
政民甚愛之部使者臧新貴將按郡至袁守自負年德
易之聞其至笑曰臧氏之子也或以告臧臧怒欲中守
法會袁有豪民嘗受守杖知使者意嗾守卽誣守納已
賕使者遂逮守脇服奪其官袁人大憤然未有以報也
一日博雞者遨於市衆知有爲因讓之曰若素名勇徒
能藉貧孱者耳彼豪民恃其貲誣去賢使君袁人失父

母若誠丈夫不能爲使君一奮臂邪博雞者曰諾卽入
問左呼子弟素健者得數十人遮豪民於道豪民方華
衣乘馬從羣奴而馳博雞者直前捽下提歐之奴驚各
亡去乃號豪民衣白衣復白策其馬麾衆擁豪民馬前
反接狗諸市使自呼曰爲民誣太守者視此一步一呼
不呼則杖其背盡創豪民子聞難鳩宗族僮奴百許人
欲要篡以歸博雞者逆謂曰若欲死而父卽前闔否則
闔門善俟吾行市畢卽歸若父無恙也豪民子懼遂杖
殺其父不敢動稍斂衆以去袁人相聚從觀歡動一城
郡錄事駭之馳白府府佐快其所爲陰縱之不問日暮

至豪民第門摔使跪數之曰若爲民不自謹冒使君杖
汝法也敢用是爲怨望又投間蠱汚使君使罷汝罪宜
死今姑貸汝後不善自改且復妄言我當焚汝廬戕汝
家矣豪民氣盡以額叩地謝不敢乃釋之博雞者因告
衆曰是足以報使君者未邪衆曰若所爲誠快然使君
冤未白也無益也博雞者曰然卽連楮爲巨幅廣二丈
大書一屈字以兩竿夾揭之走訴行御史臺臺臣弗爲
理乃與其徒日張屈字遊金陵市中臺臣慙追受其牒
爲復守官而黜臧使者方是時博雞者以義聞東南高
子曰余在史館聞翰林天台陶先生言博雞者之事觀

史氏外道
之言

明文部賞 卷之一
袁守雖得民然自喜輕上其禍非外至也臧使者枉用
三○尺○以○仇○一○言○之○憾○固○賊○蓋○之○士○哉○第○爲○上○者○不○能○察○
使○匹○夫○攘○袂○羣○起○以○伸○其○憤○識○者○固○知○元○政○紊○弛○而○變○興○
自○下○之○漸○矣○

序

送陳克彬歸臨江序

王叔英

仕路有所
憚亦是好
消息

予自兒童時則聞江西多博學高才之士衣冠文物之盛甲于天下然其民性率多輕悍忌黠爲俗喜爭而善訟故其最爲難治而南昌贛吉爲甚而臨江爲尤甚觀其諺語之傳於四方者可知矣是以天下之仕者莫不憚官於其地而其人之官於四方者亦莫不見憚於人至于旅寓於江湖通途之間者或遇其人亦莫不憚之而不敢驟與之交然予自弱冠以來徃徃見其人之來官於吾邦者或以廉稱或以能顯或以謹厚見推其愚

劣不稱任者固鮮而其以非道御物者亦不多見予固知江西之多才而疑人言不可以盡信矣今年予來金華之永康永康之令劉公某南昌人也承謝公某吉安人也二公皆以廉謹得民予至永康二公皆先以事去雖不及識其爲人而聞諸邑人之言可以知其爲君子固亦猶見之矣邑之稅使陳志善者臨江人也數過予邑庠其人溫謹樂易與物無競而其子克彬適自臨江來省爲人亦如其父而其才氣又自有出人者予于是益知江西之多才而益疑人言之不可以盡信矣豈其風俗與化移易而其人今非昔比也邪將予之所見皆

今之江右
多賢者

適值其出于衣冠文物之胄者故有以拔乎其流俗邪
是固未可知也使其人皆如予所見固云美矣使其俗
果如予所聞則居其鄉而爲其民之秀者豈不宜思所
以變之之道乎予聞古之以匹夫而化鄉人者矣信有
之矣顧其身之所立何如爾今克彬之歸也其尚益修
其身以予前所聞之俗爲鄉人戒以去其惡以予後所
見之人爲鄉人勸以進於善自一鄉而及于一邑自一
邑而及于一郡以及于一方使天下之仕者樂官於其
地而其人之官於四方者亦見樂于人而旅寓於江湖
道途者亦莫不樂其人而願與之交如是則天下之人

言江西者。不特稱其學士大夫之賢矣。豈不盛歟。不然而或終使天下之人憚之。如予所聞者。固非四方君子之所願聞。又豈不爲彼方君子之所耻哉。雖然。予浙東人也。浙之民俗。視江西伯仲之間耳。又安知天下不視之。猶江西之人乎。予之言。蓋非徒以勉克彬也。亦因以自勉焉。

序

遜志齋集序

林右

上希直方
人作于洪
武三十年
其人亦可
傳也

流而不可止者勢也、習而不可變者俗也、與勢俱往、與俗同波者、衆人也、知勢俗之所趨、而能確然以聖賢自守、不浸淫於其中者、君子也、非惟不爲勢俗之所浸淫、而吾一言一行之所達、天下之勢皆隨以定、天下之俗皆隨以化、譬若烈風震雷、鼓撼上下、無大不摧、無幽不入、雖有強梗自撓、亦安焉委靡於其下、此非聖賢豪傑之士不能當、周之末、孔子之徒已沒、楊墨之說盛行於天下、孟子慨然於布衣中、修明仁義之道、而楊墨之說

以廢孟子以來更歷秦漢既遭坑焚之禍天下學者不見全經而老佛之徒唱爲私說鼓舞天下天下之人皆相與師而尊之曰此當今之聖人也使三綱淪而九法斁其害有甚於楊墨者雖以韓文公之雄才竟不能爲天下變至宋程朱諸子者出一掃陋習頓回天下於大道之中天下之人幡然而改曰吾道固在是也然後老佛之說爲無用嗚呼當其肆爲邪說乘吾道之無人戕賊其間根蟠枝散固植人心漫不可拔天不生程朱於天下則天下之人終日昧昧如瞽者之宵行何由覩青天而見白日也哉故曰能定天下之勢化天下之俗非

聖賢豪傑之士不能也。有如雲之舟，方能適無涯之海。有鳥獲之力，方能負千鈞之重。有天下之才，方能剖天下之事。才不足於天下，而欲剖天下之事，猶乘小舟以適海，驅羸夫以負重，不待識者皆知其不可也。是故不患天下之勢不我定，天下之俗不我化，惟患我無蓋天下之學耳。彼郭林宗王道之徒，屑屑衣冠之間，猶能使天下之人効之。況吾佩服聖賢之學，而謂天下之勢不我定，天下之俗不我變哉！惜乎當今之學者，則異於是。況聞前朝之故習，竊成說爲文辭，雜老佛爲博學，志氣汙下，議論卑淺，齷齪然無復有大人君子之態。吾友方

明文奇賞 卷之一
君希直奮然而起曰是豈足以爲學不以伊周之心事
其君賊其君者也不以孔孟之學爲學賊其身者也發
言持論一本於至理合乎天道自程朱以來未始見也
天下有志之士莫不高其言論將盡棄其所學而從之
嗚呼豈非豪傑之所用心也哉常士世生豪傑之士不
多見而於吾希直見之又豈非吾之愿也哉希直之文
吾評之矣譬若春氣方至真液之色充滿廣于飛潛動
植之物各有生意天下之人莫不信之此特其一事耳
要其大者不在此也雖然文所以達志也不觀其文何
以知其志之所存余故又序其文云

傳

樂枏傳

烏斯道

應入孝友傳當與叔壽並垂不朽

樂枏者、明之定海人也、性孝友、家以亭戶籍官、枏承其役、弗替、洪武十二年春、會稽錢清高氏許從兄弟、歲輸鹽、痛自縮、迫小民、倍其輸、以掩已之數事、上聞、上以浙河以東、凡亭之大家、皆罔上賊下如一律、即遣使編各倉覆鹽有損常數者、悉起赴京鞠訊、咸承罪、坐輸作而枏亦在逮中、方治行、其仲氏枕願代往、枏曰、吾之往也、生死未可知、設死焉、吾有三子、爾尚無後、其可哉、枕又詣縣庭、請以身代枏、枏白於官曰、枏之名固不可易、服

讀至此而
不泫焉出
涕者非夫
矣

力鹽事皆枏也。梲罔知聞使往而被鞠必失對縣因不
敢遣及枏行可一舍許梲又追及之枏叱之去不聽即
乘塤垣以塊提梲垣之塊去者半梲度伯氏心不可回
始慟哭而返十三年夏枏果死京役中年三十有六枏
讀書窮理凡醫卜地理書無不習聖之人聞其死莫不
泣下其父仲本爲鄉之碩儒當被責天官方以老丐歸
而枏死惜哉論曰枏之就禍梲之請代皆知有不免
而乃毅然爭先非友愛之篤者能之乎梲雖不死昔固
分其死矣枏雖死猶不死也古伋壽之死雖不幸詩與
傳記稱之不朽者以莫伋壽若也孰謂枏梲復爲伋壽

傾動郡縣。世之兄弟有較小和害相仇。霍者。苟聞其風。當何如哉。

傳

唐珏傳

張孟兼

予過天不
寺見冬青
爲之徘徊
不能去

唐珏字玉潛會稽人也少孤能力學以明經教授鄉里
子弟而養其母至元戊寅浮圖總統楊璉真伽利宋殯
宮金玉故爲妖言惑主聽發之珏獨懷痛忿乃貨家具
行資得白金若干爲酒食陰召諸惡少享於家衆皆驚
駭前請曰平日且不敢見今召我飲又過禮不審欲何
爲雖死不避珏因泣數行下謂之曰爾輩皆宋人吾不
忍陵寢之暴露已造石函六刻記年一字爲號自思陵
以下欲隨號收之殯衆皆諾中一人曰此固義士也然

明史紀事本末卷之二十一
今無有知者、恐萬一事露、禍不測、不得終志、奈何、珏曰、
吾已籌之矣、要當易他骨焉、衆如珏言、夜往收貯遺骸、
瘞蘭亭山後、又種冬青樹爲識、約明日復來會、出金帛、
爲人人壽、戒弗泄也、璉又易宋內諸浮圖、乃哀陵骨、雜
馬牛牯牯、築白塔、號曰鎮南、以爲陵骨、良已鎮、而不知
真之他存也、亡何、汴人袁俊爲越治中、招珏爲子師、間
問曰、吾聞越有唐姓、瘞宋諸陵骨、豈君耶、坐有指珏者、
俊大奇之、手加額曰、先生義士哉、豫讓不及也、竊聞高
義之日久矣、不意得與先生處、因訊珏以故、甚貧、俊亟
爲買田宅業之、先是、珏臥疾、一夕夢吏持文來曰、帝召

君速之行至見宮闕邃麗一人冕旒中坐旁一人延上
殿又數黃衣進揖珏曰賴收遺骸無以報俄曰第報良
田二頃有妻孥以養乃復揖及闕翻然而覺莫省謂何
已而會俊料理事如夢中始悟有徵矣有謝翺者文丞
相客也與珏友善嘗感珏事爲作冬青樹引語甚悽苦
時讀者莫不灑泣翺字臯羽閩人亦奇士云傳曰予讀
晉世家知趙氏有後矣非程嬰公孫杵臼莫存其孤今
十七廟不食而有暴骨之難獨珏能葬之甚義乎哉嗚
呼珏一布衣爾其視程公孫何媿哉千載而下有國士
之風者非珏誰歟

傳

右都御史王公彰傳

朱睦㮮

奉恐繼歷
弟人而私
爲解釋者
多不然胡
爲乎章蒲
公車不能
撰其毫末
也

今則衰如
升耳矣甚
有過之當
子女以償

王彰字文昭鄭州人也洪武二十年舉于鄉明年補國
子生使山東平糴以益軍儲同行者受賄慢事彰數讓
之不從竟坐彰遂以此知名擢爲吏科源士踰年革源
士改給事中陞都給事中再陞刑部員外郎執法嚴明
人不敢干以私居未幾出補山西左參政永樂改元召
爲禮部右侍郎以憂歸服闋改戶部命祀西嶽還上疏
言陝州及新安民有鬻子女償負租者遂下詔蠲負租
官爲贖所鬻子女十一年彰改都察院右副都御史從

稅者可令
二公見

王聞乎

上北狩時母年八十時命歸省且諭之曰君子居官不
忘親居家不忘君凡所過民之安否吏之賢不肖汝宜
用意咨訪歸悉以聞既還奏上嘉悅陞右都御史十
九年春有誣讎周王不法者復命巡撫河南以察之以
二御史從行彰至跡其事無有乃上疏辯且曰臣以百
口保王無他上疑乃釋是歲河南大水民多流亡而
長吏不恤遂奏黜其貪尅者九百餘人罷不急之徵十
餘事招復流移幾五萬家發廩賑貸賴全活者不可勝
紀先是賊張大聚亡命嵯峨山行劫商賈爲之不通妖
尼宋繼善與其徒數百人扇衆作亂彰悉捕斬之事寧

不可布
不可無一
妙絕蓋如
此則人思
自勵故

省母。具食。頃有丐者至。母以餒與之。明日至府。御史以餒獻。即丐者也。其伺察之密。類此。昭皇嗣位。彰進資政大夫推恩封贈三代。如其官。宣德初。或言邊備不謹。命彰按問。自山海至居庸。還奏各關指揮而下。擅離所守之地。若干人。上令械至。訊鞫。仍命兵部三月一遣御史給事中點視。遂著爲令。明年四月。彰以疾卒。上賜棺。且命兵部給舟車歸其喪。有司營治葬域。彰性至孝。以父早世。事母甚謹。在京師所得四方珍味。必遣人馳獻。然後敢嘗。所入俸祿。必分其族人。嚴於家訓。子弟有違禮者。必痛責之。俟其改悟乃已。論曰。余聞王

震澤云鄭州公爲人恂恂而謙恭莊重至於臨法雖親
故不貸善伺察當按河南時嘗令其屬爲微行郡縣吏
有姦狀者輒置以重辟人情震讐於戲今安得若人而
一洗濁穢之風乎

序

上虞孝女朱娥詩序

唐肅

余游東浙
見曹娥廟
側更有諸
娥焉游台
州有清風
嶺之王夫
人焉其山
峻而折不
屈而寒云

予嘗過曹娥廟著論云娥未事人而歿漢稱孝女禮也
今廟祀乃以夫人謚夫有君子而後爲夫人生而女死
而夫人可乎娥之孝不以女薄不以夫人厚也及至吳
見海濱有廟祀天妃某夫人者云本閩中處女死爲海
神則又歎曰妃配也天之主宰曰帝天妃者豈帝之配
邪處女死爲神稱夫人謬矣而又謂之天妃可乎歷代
祀典掌之宗伯議之朝廷況非禮若此者孰能革而正
之哉今年來上虞邑人魏士達謂予曰吾邑有朱娥者

在宋治平三年以十歲女子死于大母之難當時里人
爲立祠邑南記之者郡從事虞太寧也政和三年邑令
席彥稷主簿孫衍尉向泳重修之記之者新定江亮也
今祠宇碑碣毀于兵火久矣里長老猶能言其故處往
徃悲悼歎惋以不能復舊爲恨宋熙寧間會稽邑令董
偕嘗以娥配享曹娥廟蓋二娥俱吳邑人曹娥廟在江
之西地屬會稽朱娥廟旣廢不得專祠而僅享它邑它
廟之祔食雖娥之神無間于此疆爾界娥之孝不以專
祠爲重祔食爲輕而吾長老子弟所以悲悼慕嚮者則
以爲非專祠於吾境不可也且舊廟寔作於民宮於此

者未嘗請封請額於上得若曹娥者尤邑人之憾也故
吾黨之士咸追詠其事而求予序之將持以爲有司告
庶幾有所感動得轉聞之上而遂其請焉嗚呼盛哉邑
人之心也夫孝風俗之本苟以孝名者千載猶一日也
朱娥之死二三百人猶思而悲之不忍廢其祭而懇
懇以爲急務蓋娥純孝有以感人心於二三百年之後
而其人亦可謂之知夫敦勸風俗之本者有司聞之寧
不奮然而興義舉乎不然則亦無異於向之官此者矣
娥之未得封謚雖若可憾然向使得之而加以非禮之
稱若曹娥天妃者猶不得也今國制一新居宗伯者

必有知禮之君子于異代之失庶幾格而正之寧甯鍾
其失乎敢而序是詩而及之以識吾晉者之感且有俟
於今之在上者云

悲以爲意終蓋賦終亦以爲入以爲二三百平之對
米穀之張二三平入辭思而悲之不惑烈其終而悲
入之以心也夫米風谷之本終以米谷者千陣辭一日也
類與亦既風煙將轉回以土而義其清其和也其
膏黨之士如出結其事而米千平之釋卦以爲其
米米常情桂結勝也土野米曹然米水馬入之測也對

記

承恩堂記

楊 溥

有盛世氣
象

皇上嗣登大寶嘉念蒼生期底雍熙圖任老成人彌綸
治化少師吏部尚書蹇公實爲之冠宣德七年秋詔有
司若曰予有輔臣粵自先朝偉著德望暨于今啓沃居
多予于庶政咨焉予于庶官審焉克允克諧實惟其人
欲新厥居以稱予優禮之意其繪圖以進有司明日以
圖進弗稱又明日更爲圖進弗稱上乃自規畫授有司
廼卜地於都城東南厥位維陽厥土維剛揀材於肆厥
木維良厥石維貞陶瓦維堅乃卜日之吉鳩工並作哀

高以平築虛以實引繩縮版以垣厥周廼建厥堂翼之以室廼闢厥路重之以門甍之甃之塗之沐之不踰月告成禮先有廟禮賓有館庖有厨汲有井有庫有廩以儲以牧輪奐咸美百用俱備復命大臣燕飲以落之肴核酒醴咸出大官公謂翰林學士楊溥曰昔晉獻文子成室諸大夫落焉當時善頌善禱者見稱于君子子何以語我溥不敢以不敏辭廼酌而祝曰惟天佑國家廼實以賢哲簡畀平格復錫以壽若周之畢公策名文武之世相成王相康王永光周室公歷四朝進位師保享高年輔聖天子丕隆太平之運溥于斯爲國家賀又酌

而祝曰明盛之世惠歸之德君子享多福而民咸樂其
樂是以錫馬蕃庶晝日三接乃惟康侯溥于斯爲天下
蒼生賀又酌而祝曰福善之報惟有德于民者爲盛古
昔名臣輔君致治實功允德孚達神明身被光榮澤流
子孫與國同久詩曰維其有之是以似之溥于斯爲公
賀公酌而復曰聖天子之恩篤不敢忘子亦可謂善頌
者矣謹名其堂曰承恩堂請書此以爲記

記

重修至德廟記

周忱

俗吏不能
通

宣德五年秋七月、禮部郎中況鍾、伯律奉璽書、擢守于蘇州、視事之日、吏以囚牘進、見民之繫于獄者、凡千餘人、尚爭務勝、交相訐訟、有經十餘載而未決者、伯律姑置弗問、越明日、率郡之父老進謁于吳泰伯廟、見其堂宇傾仆、垣墉頽圯、吏民奉祀弗虔、乃喟然歎曰、民不見德、宜乎刑之不清也、是非郡守之先務乎、即日命工度材、撤其舊而新之、曰堂、曰室、曰門、曰廡、爲屋凡四十楹、繚以周垣、堅以甃甃、不十日而告成、復率父老、潔牲醪

祇祀于廟、居人過客瞻望咨嗟、于是獄之繫囚交相愧悔、曰、泰伯以天下讓、民無德而稱焉、吾輩所爭、僅錐刀之末耳、何重貽郡侯之羞乎、皆相與俯伏庭下、自服其辜、不數日而獄以空虛告、予時奉命巡撫于江南、列郡至蘇州、祇謁祠下、父老以其事告、且曰、晉者狄梁公以冬官侍郎爲江南巡撫、使毀吳楚淫祠千七百所、而此廟則在所留而不毀者、去今千年、得吾黽侯葺而新之、巡撫使之來、又適當其時、吳民觀感興起、自今其無復爭競之風乎、予乃登其父老而告之曰、方泰伯之奔吳也、斷髮文身、示不可立、然荆蠻義之後而歸之千餘

家遂端秀以臨其民。是欲辭富貴而富貴隨之。及其後世。夫差狃于必勝。窮兵殲武。破越困齊。欲霸天下。卒之國亡身戮。妻子爲虜。是欲求富彊而失其富彊矣。然則吳地數千年之富庶。由泰伯之三讓。有以致之也。其鬪訟之成風者。亦由夫差之好勝。有以啓之也。爾民欲爲泰伯之讓乎。欲效夫差之爭乎。一則廟食萬世。一則貽譏千載。其得與失。必有能辨之者。孔子曰。能以禮讓爲國乎。何有。則予與太守期望於吾民之意。父老曰。善。請以是爲記。遂書于麗牲之石。使四方之來謁者咸有所觀感而興起焉。豈獨蘇州之民而已哉。

[Faint vertical text columns visible through the paper]

書

與行在戶部諸公書

周忱

公要做事
尤與戶部
諸公說破
此書吳父
老子弟宜
家藏一通

伏聞治民之道在於禁惰游以一其志。勸耕稼以敦其
果。蓋惰游禁則土著固而避勞就逸者無所容。耕稼勸
則農業崇而棄本逐末者不得縱。由是賦役可均而國
用可足。苟或不然則戶口耗而賦役不可得而均。地利
削而國用不可得而給。先王制六鄉六遂之法以維持
其民而均其土地者。正謂此也。邇者皇上念天下人
民有因饑窘逃移者。累降勅旨。設撫民之官。頒寬恤之
條。令天下郡邑招而撫之。諸公頒布奉行。克謹無怠。天

下之民感戴

宏恩扶老携幼競返桑梓惟獨蘇松之

民尚有遠年竄匿未盡復其原額而田地至今尚有荒蕪者豈優恤猶未至乎凡招回復業之民既蒙蠲其稅糧復其徭役室廬食用之乏者官與賑給牛具種子之缺者官與借貸朝廷之恩至矣盡矣如此而猶不復業者亦必有其說焉蓋蘇松之逃民其始也皆因艱窘不得已而逋逃及其後也見流寓者之勝於土著故相煽成風接踵而去不復再懷鄉土四民之中農民尤甚何以言之天下之農民固勞矣而蘇松之民比於天下其勞又加倍焉天下之農民固貧矣而蘇松之農民比

於天下其貧又加甚焉。天下之民常懷土而重遷。蘇松之民則常輕其鄉而樂於轉徙。天下之民出其鄉則無所容其身。蘇松之民出其鄉則足以售其巧。忱嘗歷詢其弊。盖有七焉。何謂七弊。一曰大戶苞蔭。二曰豪匠冒合。三曰船居浮蕩。四曰軍囚牽引。五曰屯營隱占。六曰鄰境蔽匿。七曰僧道招誘。其所謂大戶苞蔭者。豪勢富貴之家。或以私債準折人丁男。或以威力強奪人子息。或全家傭作。或分房托居。賜之姓。而目爲義男者有之。更其名。而命爲僕隸者有之。凡此之人。旣得爲其役屬。不復更其糧差。甘心倚附。莫敢誰何。由是豪家之役屬。

日增而南畝之農夫日以減矣。其所謂豪匠冒合者、蘇松人匠、叢聚兩京、鄉里之逃避糧差者、徃徃携其家眷、相依同住、或創造房居、或開張舖店、冒作義男女婿、代與領牌、上工在南京者、應天府不知其名、在北京者、順天府亦無其籍、粉壁題監局之名、木牌稱高手之作、一戶當匠而冒合數戶者、有一人上工而隱藏數人者、有之。兵馬司不敢問、左右鄰不復疑、由是豪匠之生計日盛、而南畝之農民日以衰矣。其所謂船居浮蕩者、蘇松乃五湖三泖積水之鄉、海洋海套無有浮涯載舟者、莫知蹤跡、近年以來、又因各處關隘廢弛、流移之人挈

家于舟以買賣辦課爲名冒給鄰境文引及河泊所由帖往來於南北二京河廣河南淮安等處停泊脫免糧差長子老孫不識鄉里煖衣飽食陶然無憂鄉都之里甲無處根尋外處之巡司不復詰問由是船居之丁口日蕃而南畝之農夫日以削矣其所謂軍囚牽引者蘇松奇技工巧者多所至之處屠沽販賣莫不能之故其爲事之人充軍於中外衛所者輒誘鄉里貧民爲之餘丁擺站於各處河岸者又招鄉里之小戶爲之使喚作富戶於北京者一家有數處之開張爲民種田於河間等處者一人有數丁之子姪且如淮安二衛蘇州充軍

者、不過數名、今者填街塞巷、開鋪買賣、皆軍人之家屬、
矣、儀真一驛、蘇州擺站者、不過數家、今者連薨接棟、造
樓居住者、皆囚人之戶丁矣、官府不問其來歷、里胥莫
究其所從、由是軍囚之生計日成、而南畝之農夫日以
消矣、其所謂屯營隱占者、太倉鎮海金山等衛、青村南
匯吳淞江等所、棋列於蘇松之境、皆爲邊海城池、官旗
犯罪例、不調伍、因有所恃、特賜豪強、遂使避役奸氓、轉
相依附、或入屯堡而爲之佈種、或入軍營而給其使令、
或竄名而冒頂軍伍、或更姓而假作餘丁、遺下糧差、負
累鄉里、爲有司者、常欲揆究矣、文書數數行移衛所、堅

然不答爲里甲者常欲根尋矣足跡稍稍及門已遭官
旗之毒手由是也營之藏聚日多而南畝之農夫日以
耗矣其所謂鄰境蔽匿者近年有司多不得人教導無
方禁令廢弛遂使蚩蚩之民流移轉徙居東向而藏於
西鄉者有焉在彼縣而匿於此縣者有焉畏糧重者必
就無糧之鄉畏差勤者必投無差之處舍瘠土而就膏
腴者有之營新居而棄舊業者有之倏往倏來無有定
志官府之勾攝者因越境而有所不行鄉村之譏察者
每容情而有所不問由是鄰境之客戶日衆而南畝之
農夫日以寡矣其所謂僧道招誘者天下之寺觀莫盛

於蘇松故蘇松之僧道彌滿於四海有名器者因保舉而爲住持初出家者因遊方而稱掛塔名山巨剎在處有之故其鄉里游惰之民率皆相依而爲之執役眉目清俊者稱爲行童年紀強壯者名爲善友假服緇黃僞持錫鉢或合併而修建齋醮或沿街而化緣財物南北二京及各處鎮市如此等輩莫非蘇松之人以一人住持而爲之服役者常有數十人以一人出家而與之幫閑者常有三五輩由是僧道之徒侶日廣而南畝之農夫日以狹矣凡此七者特舉其大畧而天下郡縣此弊未必俱無縱使有之亦未必有如是之甚此等之人善作巧

僞變亂板圖、戶口則捏他故而脫漏、田糧則挾他名而詭報、情游已久、安肯復歸田里、從事耕稼、況其缺乏稅額累累如配、見在之戶、其中頗有智能者、見其得計、亦思舍畎畝棄耒耜而效其所爲、惟愚騃無用之人、方肯始終從事於農業、然坐受其弊、亦豈無避免之心乎、凡天下之事、不可有一人之僥倖、苟有一人僥倖而獲免、則必有一人不幸而受其弊、蘇松僥倖之民如此、其多則不幸而受其弊者從可知矣、是宜土著之農夫日減、月除而無有底止矣、忱嘗以太倉一城之戶口考之、洪武年間、見丁授田十六畝、二十四年黃冊原該六十七

里八千九百八十六戶、今宣德七年造冊、止有一十里
一千五百六十九戶、覈實又止有見戶七百三十八戶、
其餘又皆逃絕、虛報之數、戶雖耗、而原授之田俱在、夫
以七百三十八戶、而當洪武年間八千九百八十六戶
之稅糧、欲望其輸納足備、而不逃去、其可得乎、竊恐數
歲之後、見戶皆去、而漸至於無徵矣、是皆惰逃不禁、耕
稼不勸、故奸民得以避勞就逸、棄本逐末、如前之所云
者、誠宜立法以檢制之、撫民之官、固未易以招之也、愚
以鈍駑之才、濫叨重寄、晝夜勞心、莫知所措、伏望該部
列位卿相、與在朝公卿大臣、詳加講究、明白奏請、將蘇

松等府逃移人戶不拘通例別立一法以清理而檢制之庶幾戶口可增田畝可闢稅糧可完忱事出激切不覺覩縷之至惟冀詳察而恕其狂妄幸甚

序

東里續集序

李時勉

數十年太
平相畢竟
有不可及
處余識其
集藹恢弘
博大人也

少師兵部尚書兼華蓋殿大學士東里楊先生未仕時
遊湖湘與楚府教授吳由翁爲莫逆交由翁鄉前輩
嘗爲予言先生博學而有智端敏而寬厚識達事體不
矜已傲物爲文章獨追古作者後來當必鳴世而其才
德可大任予聞而識之其後往往得先生文讀之愈深
企慕欲一相見不可得及忝進士被選入翰林而先生
已居禁近叅掌機務尋常少得見獨一見歡如平生其
所以教愛之意甚厚出入翰林三十餘年見先生言語

動靜與其所行事公平廣大寬和而有則其心專在於
國家未嘗有一毫私已圖至於臨大政決大疑衆皆爭
論紛紜先生獨無言久之徐爲一言衆莫不懾服至有
輿論不一須上聞者旣以聞卒從先生言其在上前
遇事盡言不計利害每辨論人賢否及解釋人過失一
出於公不以恩讎爲重輕取舍至於獻可替否有旋乾
轉坤之力然未嘗與人言韓子云入以告其君出不使
人知者大臣宰相之事於先生見之先生以其餘力發
爲文辭渾淪溫潤謹嚴而淨密如精金粹玉自足以見
重於世夫文章之見重於世以其人也苟非其人雖美

而傳反以爲病矣。楊雄、柳子厚、王安石、文非不美也。人或因是而訾之。由其所行悖焉耳。董仲舒、諸葛孔明、陸贄、范希文之流、讀其書、思其人、恨不生其時、聽其論議、以求其益、則其文章之存、與日月爭光可也。誰得而議焉。先生之志固無異乎四君子者。而仕宦四十餘年、歷事四朝、其功在國家、德在生民、所謂先天下之憂而憂、後天下之樂而樂者、庶乎其無所愧焉。其文章之足以垂世而傳遠者、豈偶然之故哉。先生病在麻、以其續文藁授子曰、其爲我序之、以付孺子、藏於家。予文未成、而先生沒。嗚呼、先生其可死也耶。國家柱石、後進儀

刑一日不見其感念之情、慟悼之意、豈獨予一人哉、思其游處、思其笑語、聲音容貌宛然在目、其何能以序其文也耶、然先生治命不可違、遂按淚而序之、如此先生字士奇、東里其別號也、

疏

緝熙聖學疏

薛瑄

切見近日有臣下進言欲開經筵以緝熙聖學者雖蒙聖德允納未見施行蓋欲候軍旅事平之日以開講也臣愚以爲當聖主中興之時天步艱難之日正講論爲學爲治之道不可一日而緩焉者也晉漢光武躬擐甲冑討除羣兇猶且投戈講枕息馬論道軍旅間未嘗一日廢學故能舉羣盜如鴻毛復大業如反掌唐太宗興義兵埽除寇亂一時潛邸從龍之人皆文學智謀之士日久相與論爲學致治之道乙夜之覽身忘其

倦故能剗削僭偽拯濟生民此講學所以有資於戡大難也。近者漢北醜虜雖陸梁爲寇而內外禦侮各有其人。堂堂天下號令一施風行草偃。非至如漢唐草昧之秋也。顧可以斯時而少緩講學之事乎。伏望皇上命廷臣集議經筵儀式務從簡約不尚奢華仍博選公卿侍從文學之臣有學術純正持已端方謀深慮遠才識超卓通達古今明練治體者一二十人使之更代入直。恭遇皇上視朝之暇日御便殿即召各臣進講其所講之書先大學論語孟子中庸兼講尚書春秋諸史則資治通鑑綱目務要詳細陳說聖賢修己治人之要懇

切開告帝王端心出治之方以至唐虞三代漢唐宋以
來人君行何道而天下治安爲何事而天下乖亂與夫
賞善罰惡之典任賢去邪之道莫不畢陳於前如此則
勸講之官庶可日修其職講官之職旣修雖皇上聰
明之資寔由于天錫而朝夕緝熙啓沃之力亦有資于
聖心聖德日明于以修治道則正心以正朝廷正朝
廷以正百官正百官以正萬民而治道有修明之效于
以攘夷虜則修軍政以簡將帥以練士卒以討夷虜而
夷虜有殄滅之期此講學有資於成大功戡大難宜急
行之而不宜緩焉者也

明倫彙編 家範典 卷之十
聖公出望野且開于以舒舒德服而少以五德委五德
開多資冥由于天降而神交轉聖君天之成我休育于
德結之官規有得舒其輝輝守之輝輝舒德皇土廟
賞善罰惡之典舒德表邪之德其不畢則於前收此恨
來入吾許何哉而天王欲安為何事而天下非歸與夫
以開者帝王歸心出命之志以爲貴三分其德求以

說

猫說

薛瑄

予家苦鼠暴乞諸人得一猫形魁然大爪牙銛且利予私計鼠暴當不復慮矣以其未馴也繫維以伺候其馴焉羣鼠聞其聲相與窺其形類有能者恐其噬已也屏不敢出穴者月餘日旣而以其馴也遂解其維繫適覩出殼雞雛鳴啾啾焉遽起而捕之比家人逐得已下咽矣家人欲執而擊之余曰勿庸物之有能者必有病噬雛是其病也獨無捕鼠之能乎遂釋之已則怵怵泯泯饑哺飽嬉一無所爲羣鼠復潛視以爲彼將匿形致已

也。猶屏伏不敢出。旣而鼠窺之益熟。覺其無他異。遂歷穴相告曰。彼無爲也。遂偕其類復出。爲暴如故。余方怪甚。然復有雞雛過堂下者。又亟往捕之而走。追則嚙者過半矣。余之家人執之至前。數之曰。天之生材不齊。有能者必有病。舍其病。猶可用其能也。今汝無捕鼠之能。而有噬雞之病。真天下之棄材也哉。遂笞而放之。

平恕之心

疏

請旨自將復仇疏

于謙

昔以多兵
爲憂今以
無兵爲憂
古今人不
相及如此

近該各邊送到走回人口屢報虜酋脫脫不花與也先
讐殺而大同等處亦報煙火聲息臣等切惟也先違背
天道辜負國恩一旦無故生釁侵擾邊境荼毒生靈
雖悔過摠誠遣使入貢而罪大惡極終不可容臣謙備
員總兵日夜兢惕思所以報朝廷之恩思所以雪前
日之恥今犬羊自相吞噬是天授以復讐之機而不可
失也且虜寇驚散擾亂必來窺伺我邊今春東作之時
未免有妨耕種若非振以兵威令其遠遯則邊方屯田

之事恐未能成。臣等再三計議，欲各統在京馬軍五千。臣謙往宣府，臣亨往大同，其餘將佐于范廣、楊俊、孫鏜、過興、張義、雷通、石彪、郭英、劉深、崔福、劉鑑等內定奪前去。蓋京師非無軍馬，若帶去太多，恐費邊儲。且兵貴乎精，不貴乎多，故也。臣等到邊遇警，則所在各城軍馬悉聽臣等調度。如賊勢大，必用添軍勦殺，另行奏請定奪。如蒙允，臣等所請就將三營團操軍馬內挑選停當，整理部伍，收拾軍裝什物等件。至二月中旬以後，天氣漸和，啟發前去。兵部仍先行各邊各關整撤軍馬，以爲聲援預備。策應其餘軍前合用事件，臨期具奏。臣

酒知安飽
二字與經
涉濟人了無

等素乏謀勇之材又無勲閥之望叨受恩寵任寄兵戎
苟於此時而不奮忠義之氣竭涓埃之報則是負天地
生成之恩其於天下後世之清議亦有所不容者臣等
昧死具題景泰三年正月二十二日

辭欽賜第宅疏

欽蒙 聖恩賜臣房屋居住臣粉骨碎身不能補報臣
才非經濟質本凡庸遭際 聖明驟膺顯擢官資崇重
方慚無補于涓埃門地寒微何意遷居於大厦况 朝
廷多事之秋非臣子安居之日加以臣比年以來染患
疾動輒喘急行步遲緩寓宿直房庶便朝謁雖居數椽

萬一和議旣行而彼有無厭之求非分之望從之則不可。違之則速變。此勢有所不可和也。苟以爲虜強難制姑從和以緩其兵臣等請質之前代宋真宗澶淵之役契丹之衆累被我兵摧阻旣盟之後朝廷尚歲輸銀絹及季世徽欽北狩中國名將如張韓劉岳之徒屢敗金師及奸臣秦檜一主和議朝廷旣割境土以與之又輸歲幣以賄之甚至降黜尊號含垢忍恥屈已從和卒至人心解體國勢陵夷無救成敗而後已。援古証今和議之不足恃也明矣。爲今之計莫若選將練兵養威蓄銳賊若來侵則相機而勦殺賊若遠遁不貪利以窮追萬

心膽俱厲

一虜寇復有大舉入寇之謀則我兵操習有素加以將帥思奮臣等當盡死効力以圖勦滅以雪國恥必不出犬羊之下其或皇天厭亂黜虜自知數寇不利遣使入貢則量與賞賜遣回亦不拒絕而已若欲朝廷先遣使臣往彼通好則示彼以弱而啟其輕侮之心萬萬不可此則方今之要務而臣等之愚見也

糾避事武臣疏

嘗謂竭力盡忠乃人臣之當務懷姦避事在國法所難容切照寧遠伯任禮本以庸流叨居重任所宜感激奮勵不避艱危用竭犬馬之勞以圖涓埃之報可也今

本官外示退遜而中藏詐謀身躋顯榮而心無補報膏
梁純綺縱嗜欲以爲能介胄干戈咸捨置而不問先年
甘肅鎮守惟務營私利已不能禦侮安邊窺見邊務方
殷遂乃上章辭職既蒙取回赴京自合辭祿致仕却又
不安本分望外希求計囑昌平侯楊洪奏保伊曾經戰
陣精神未邁乞令管軍以備調用已蒙欽准本官今
在三千營同楊洪操練軍馬並無寸長可稱亦無一策
可措近該本官照得紫荆白羊倒馬關口等處易州涿
州保定真定通州係屏蔽京師緊關衝要去處合當
增兵守備遣將巡督議擬摘撥官軍委官統領前去

等爲見任禮係先朝舊臣遷郵宿將若是簡拔任用
必能宣力竭忠豈徒望其禦侮折衝而實賴其發縱指
示乞請勅命本官統兵於前項地方關口內外往來
巡守已於本年四月二十六日奏准行令任禮欽遵
去後豈期任禮罔顧人臣之義終懷負國之心奏稱
年老不堪領軍切詳任禮先該楊洪薦伊在京管操軍
馬欣然就事畧無難色及改擬前去畿甸巡守輒稱老
病不肯啟行臣等切惟周之姜尚八十而佐武王滅紂
興周漢之趙充國七十餘而請自將屯田以降先零今
任禮年齒無姜尚充國之邁又况各關各城去京不遠

明倫彙編 家範典 卷之十一
五十三
當此人心搖惑之際。國步艱難之時。本官一身体戚。實與國家共之。今却不思忘身而濟難。乃敢方命而孤恩。原心實出於奸謀。論罪當加於極典。及照楊洪明知任禮倚老推奸。不肯盡心爲國。意在擅作威福。暗邀人心。聽從囑托。朦朧薦舉。夫以任禮楊洪俱爲大臣。受恩深重。手握兵柄。身倚安危。方且欺心玩法。退縮顧望。若此。將何以爲羣臣之表率。朝廷之倚賴哉。合將各官通行拿送法司。究問治以重罪。以爲人臣懷奸不忠欺上方命之戒。

大同 徵稅糧疏

臣因大同地方民貧歲歉具奏蠲免停徵稅糧近奉
戶部行臣文劄似以臣言爲妄臣觀本部所議有曰正
德十六年大同有災州縣衛所已照分數除豁無災稅
糧不知緣何停徵者臣惟大同連年饑荒小民貧苦去
冬今春斗米幾值三錢事勢之極言之不殫至于先年
奏報災傷欠貢乃是。有。司。不。恤。民。隱。之。罪。豈。可。以。此。遂
以爲大同有無災之地有不饑之民哉本部所議又有
曰大同一鎮本部給發甚多者夫大同所發該部錢糧
乃是供給軍馬調度之用固未聞該部發幾萬兩濟某
縣之饑又曾發幾萬兩寬某州之稅也今乃以此而塞

臣之請是猶以東家之負欠而奪西隣之契券也。本部所議又有曰本鎮歲徵不足歲用天地所生財貨百物不在官則在民收貯在官者堪以接濟則拖欠在民者乃可寬徵。臣愚不能遠舉古昔且如成化年間山西陝西之饑比時朝廷亦發太倉銀數十萬兩出賑臣愚不知彼時發銀之時各處地方在官者豈皆在在贏餘邪亦爲當時在官者已竭而後發之銀又未知當時各處地方賑之而仍徵稅糧與否也大同之饑實與之同而又過之賑濟旣已不得求免稅糧又所不允是大同之民旣不得與往日山西陝西之民比又不得與今日

山東直隸之民比也。夫邊民之苦較之腹裏特爲異甚。腹裏每畝徵草二束而大同乃每畝四束。腹裏稅糧每有輕額而大同存留之外皆供王府祿米。此其苦一也。地寒霜早耕獲不得其時或有虜患人畜俱亡。此其苦二也。軍儲缺乏每每動調人馬輒搜民間名雖和買其實害不可言。此其苦三也。商販不通無貿易之利。此其苦四也。州縣長吏舉人者少。進士者絕無。惟知科索不知撫字而各衛所首領官員及分守守備內臣比肩而立皆須供億。民少官多。此其苦五也。是以數十年來村邑蕭條版籍凋落其視成化弘治以前十去六七。此

而不恤。必至無民。若苟無民。豈有大同。旣無大同。豈復有京師。夫邊民者。所以捍禦腹裡。朝廷恩澤宜特加優渥。今乃有腹裏所無之苦。無腹裏所有之恩。何也。今大同非有強虜。南有礦賊。而號稱虎頭者。時又竊發。今州縣小民。以升斗之粟。坐強盜死者不少。中間有弟兄三四人者。又有親戚三四人者。此其事勢豈可不慮。夫民心離向。幾微隱伏。固知廟堂之上。此非所急。至於變生禍作。獨不用財乎。該部所稱天之所生財貨。百物不在官。則在民。是誠至論。臣愚不知今日之財貨。果在官乎。若以爲今之天下。家給人足。臣雖無似。斷不敢

言
人不敢

該部豈肯

以是欺。陛下也。昔者。先帝臨御。號稱積財如權。奸
劉瑾。宸濠。錢寧。江彬。張銳之屬。皆富敵于國。今皆抄沒
在官。當時內府。豈無掌管。豈無文簿。收記。此乃今日財
賦根源之地。司國計者。正當惟是之求。稽其出入。而盡
還之于太倉。使宮闈不得占據。貴戚內臣。不得濫竊。一
疏不允。再疏請之。再疏不允。三疏請之。三疏不允。則以
身爲之去就。繼之者。又復如是。則聖明之上。豈有終不
見從者哉。足國裕民。實在於此。若以此等財貨。皆入左
右近侍。宮闈貴戚之手。不可必得。而姑民之求。則非
今日聖明之治。而亦非天下之所望於該部者也。該

部所議又有曰若是依擬停徵盡免作何區處何發放
支臣愚以爲區處之策惟力請內帑之銀是也臣聞
之古人賢聖君臣所以足國裕民亦自有其道昔者漢
文帝露臺惜百金之費所幸慎夫人衣不曳地而復今
年賜民田租明年賜民田租衛文侯衣大布之衣始年
有車五十乘季年乃三百乘今朝廷之上內外官廕
日有濫書貴戚賞賜占據橫不可制司禮監之奏乞諸
內臣之濫設言者屢及之而不抑所以糜爛其財賦者
不知其幾何此正司國計者之憂乃于靡有孑遺之民
而屑屑取盈焉此其道何也臣前奏免糧該部令臣查

計臣惟計
取民而不
知爲民計

考去處見今有司徵停兩無所從臣近日又奏邊務事
亦未奉明示敷政優游固爲聖明寬裕博大之體然
于臣等小臣熙事圖功承流宣化不無延引歲月伏乞
陛下特勅該部查臣所奏如果妄誕乞卽加罪譴明示
天下以爲人臣不忠之戒如或有理乞卽施行

天一人耳不忠之知法存亦野之明故在
劫不替懷慈臨查耳河奏咬果受道之明心罪盡
于月平山日照事圖交承流外不無我民處月
亦未奉册示姓姓姓姓姓姓姓姓姓姓姓姓
姓姓姓姓姓姓姓姓姓姓姓姓姓姓姓姓姓
姓姓姓姓姓姓姓姓姓姓姓姓姓姓姓姓姓

